

କରିହ୍ନୀୟମାନଙ୍କ ନିକଟକୁ ପାଉଲଙ୍କ ଦ୍ଵିତୀୟ ପତ୍ର କରିହ୍ନୀୟ ବିଶ୍ଵାସୀକତାଃତେ ପ୍ରେରିତ୍ ପାଉଲୁସ୍ଆଃ ଏଟାଃ ଚିଟାଉ ପାରିତାଏ

ହବାସାକାଅଆଃ, କରାହ୍ନୀୟ କାଲିସିୟାତେ ପ୍ରେରିତ୍ ପାଉଲୁସ୍ଆଃ ନେ ଏଟାଃ ଚିଟାଉ ଯୀଶୁ ଖ୍ରୀଷ୍ଟୁଆଃ ଜାନାମ୍ ତାୟମ୍ ୫୫-୫୭ ସିମ୍ବୋଲରେ ଅଲ୍ଲାନାନ୍ ତାଇକେନା ୧:୧ । ଅନଲ୍ ହତ୍ତକ ବିଶ୍ଵାସେ ତାନାକ ଯେ, ନେ ଚିଟାଉ ଅନଲ୍ ସିଦାରେ ପ୍ରେରିତ୍ ପାଉଲୁସ୍ କରାହ୍ନୀୟ କାଲିସିୟାକେ ପୁରାଃ କେଟେୟାନଗି ଚିଟାଉ ଅଲ୍ଲାନାନ୍ ତାଇକେନାଏ, ଏନା ୨:୩-୪ ରେ ଆଟ୍ଟକାରଃତାନା, ଏନାରେୟାଃ ଜେତାନ୍ ଅନଲ୍ରେୟାଃ ନାକାଲ୍ ଆବୁତାଃରେ ବାନଃଆ ।

ହବାସାକାଅଆଃ, ପାଉଲୁସ୍ ମାକିଦନିଆରେ ତାଇକେନ୍ ଇମ୍ତାଏ ଅଲ୍ଲାନାନ୍ ତାଇକେନା, ୨:୧୩ । ଏଟାଃ କରାହ୍ନୀୟ, ଏଟାଃ ନାହ୍ଲାଃ, ଏନ୍ ମିଆଁଦଗି ତାନାଃ । କରାହ୍ନୀରେ ତାଇନଃତାନ୍ କାଲିସିୟା ବିଷାଏରେ ତିତସ୍ତାଃଏତେ ବୁଗିନ୍ କାଜି ନାମକେଦ୍ତେ ପାଉଲୁସ୍ ରାସ୍କା କାନାଏ । ନେ ଚିଟାଉରେ, ନାଝା ନିୟାମ୍ରେ ଦାନ୍ ଏମ୍ ବିଷାଏରେୟାଃ ଇନିତୁ ନାମାଃବୁ । ନେ ହିସାରେ, ପାଉଲୁସ୍ ଯୀରୁଶାଲେମ୍ରେନ୍ ବିଶ୍ଵାସୀକକେ ଦେଙ୍ଗାକ ନାଗେନ୍ତେ ଟାକା ପାଏସା ହାରମ୍ ନାଗେନ୍ତେ ଆବୁକାଦା, ୮-୯ । ନେ ଚିଟାଉରାଃ ଚିମିନ୍ ଅନଲ୍ରେ ସାରିୟଃତାନା ଯେ, ଏନ୍ କାଲିସିୟାରେୟାଃ ବାହାରିଏତେ ଚିମିନ୍ ହସତ୍ତ ପ୍ରେରିତ୍ତକ, ଆପ୍ନାଃ ମାଇନଃ ହବାଅଃ ନାଗେନ୍ତେ ପାଉଲୁସ୍ଆଃ ବିରୁଧ୍ରେ କାଲିସିୟାରେନ୍ ଚିମିନ୍ ହତ୍ତକକେ ବତଙ୍ଗାକେଦ୍ତେ ହିସ୍ତଙ୍ଗାକଟିକ ତାନାକ । ଇନ୍କୁ ପାଉଲୁସ୍ଆଃ ଆକ୍ତେୟାର୍ତ୍ତକେ ଆଡ଼ାଃଉଡ଼ଗୁଃ ତାନାକ ଏନାତେ ନେ ଚିଟାଉରେୟାଃ ବୁଣ୍ଡୁୟାଃରେ ଇନିଃ ମିଆଁଦ୍ ଯୀଶୁ ଖ୍ରୀଷ୍ଟୁଆଃ ଆକ୍ତେୟାର୍ତ୍ତକେ କୁଲ୍ଲାନିନିଃ ତାନିଃ ମେନ୍ତେ ପୁରାଃ

ପକ୍ତାକେଦ୍‌ତେ ଉଦୁବାକାଦା ।

ପୃଥ୍ୱ ଭିତ୍ତାରେ ତାଇକାନ କାଜି

- ୧. ପାଉଲୁସ୍‌ଆଃ ଚିଟାଉରେୟାଃ ଏନେଟେଦ୍‌ରେ ଜହାର୍ ମେନ୍ତେ ଅଲାଇକାଦା । ୧:୧-୭
- ୨. ପାଉଲୁସ୍‌ଆୟାଃ ହରାସେନ୍ ସେକାଡେନ୍‌ରେ ବାଦ୍‌ଲାଇଅ ଆଡଃ ଇନ୍‌କୁଆଃ ବିଷାଏରେ ନାମାକାଦ୍ କୁନ୍‌ଲି ଆଡଃ ଇନ୍‌କୁଆଃ କୁନ୍‌ଲି ବିଷାଏରେ ଇନ୍‌କୁକେ କାଜିରୁହାଡ୍ । ୧:୮-୭:୧୭
- ୩. ପାଉଲୁସ୍ ଯାରୁଶାଲେମ୍‌ରେନ୍ ବିଶ୍ୱାସୀକ ନାଗେନ୍ତେ ଦାନ୍ ହାରମ୍ ବିଷାଏରେ ଆନାରୁ । ୮:୧-୯:୧୫
- ୪. ରୁଣ୍ଡୁରେ ପାଉଲୁସ୍ ଆୟାଃ ପ୍ରେରିଡ୍ କାମିକେ ବାଚାଅକେଦା ଆଡଃ ଆଡଃମିସା ହରାସେନ୍ ନାଗେନ୍ତେ ସାପ୍‌ଡାଅନ୍ ତାନା । ୧୦:୧-୧୩:୧୦

୧ ✨ଆଇଙ୍ଗ୍ ପାଉଲୁସ୍, ପାର୍‌ମେଶ୍ୱାର୍‌ଆଃ ସାନାଙ୍ଗ୍ ଲେକାଡେ ଯୀଶୁ ଖ୍ରୀଷ୍ଟ୍‌ଆଃ ମିଆଁଦ୍ କୁଲାଇକାନିଃ ତାନିଙ୍ଗ୍ । ପାଉଲୁସ୍, ଆଡଃ ଆରୁଆଃ ହାଗା ତାମଥ୍, କରିଛିରେ ତାଇନଃତାନ୍ ପାର୍‌ମେଶ୍ୱାର୍‌ଆଃ କାଲିସିୟାରେନ୍ ହଡକକେ, ଆଡଃ ଆଖାୟା ପାର୍‌ଗାନ୍‌ରେ ତାଇନଃତାନ୍ ପାର୍‌ମେଶ୍ୱାର୍‌ଆଃ ସବେନ୍ ବିଶ୍ୱାସୀକତାଃତେ ନେ ଚିଟାଉ ଅଲେତାନାଇଙ୍ଗ୍ ।

୨ ଆରୁଆଃ ଆପୁ ପାର୍‌ମେଶ୍ୱାର୍‌ଆଃ ଆଡଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ସାୟାଦ୍ ଆଡଃ ଜୀଉସୁକୁ ଆପେ ନାଗେନ୍ତେ ହବାଅଃକା ।

ପାର୍‌ମେଶ୍ୱାର୍‌କେ ପାଉଲୁସ୍‌ଆଃ ଧାନ୍ୟାବାଦ୍

୩ ଦଲାରୁ, ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ଆପୁ ପାର୍‌ମେଶ୍ୱାର୍‌କେ ସାହାରାଅରୁ ଏମାଇୟା, ଇନିଃ ଲିନିବୁଇ ଆପୁ ଆଡଃ ସବେନାଃରେ ଜୀଉରାଡେଃ ଏମତାନ୍ ପାର୍‌ମେଶ୍ୱାର୍ ତାନିଃ । ୪ ଇନିଃଦ ଆରୁଆଃ ସବେନ୍ ଦୁକୁହାସୁ ଇମତା ଜୀଉରାଡେଃ ଏମାବୁତାନାଏ, ଏନାମେନ୍ତେ ଆରୁ ପାର୍‌ମେଶ୍ୱାର୍‌ତାଃଏତେ ନାମାକାଦ୍ ଏନ୍ ଜୀଉରାଡେଃରେୟାଃ ହରାଡେ, ସବେନ୍ ରାକାମ୍‌ରାଃ ଦୁକୁହାସୁତାନ୍ ହଡକକେ ଜୀଉରାଡେଃରୁ ଏମ୍ ଦାଡିୟା । ୫ ଆରୁ ଖ୍ରୀଷ୍ଟ୍‌ଆଃ ନାଗେନ୍ତେ ଚିମିନ୍ ଦୁକୁହାସୁରୁ ନାମେୟା, ଇମ୍‌ନାଙ୍ଗ୍ ଖ୍ରୀଷ୍ଟ୍‌ଆଃ ହରାଡେ ପାର୍‌ମେଶ୍ୱାର୍‌ତାଃଏତେ ଜୀଉରାଡେଃରୁ ନାମେୟା । ୬ ଆଲେ

✨ ୧:୧ ୧:୧ ପ୍ରେରିଡ୍ ୧୮:୧.

ଦୁକୁହାସୁତାନରେଦ ଏନା ଆପେୟାଃ ଦେଞ୍ଜା ଆତଃ ଜୀଉବାଞ୍ଚାଅ ନାଗେନ୍ତେଲେ ରିକାତାନା । ଆଲେ ଜୀଉରାଡ଼େଃଲେ ନାମେରେଦ, ଆପେୟ ଏନ୍ଲେକାଗି ଦୁକୁହାସୁ ନାମେ ଇମ୍ତା ସାହାତିଙ୍ଗ ଆତଃ ପେଡ଼େଃପେ ନାମ୍ ଦାଡ଼ିୟା ।^୭ ଆପେତାଃରେ ଆଲେୟାଃ ଆସ୍ତା କେଟେଦ୍‌ଗିୟା, ଚିୟାଃଚି ଆପେ ଚିଲ୍‌କା ଦୁକୁହାସୁରେନ୍ ହିସା ହବାକାନାପେ, ଏନ୍ଲେକାଗି ଆଲେୟାଃ ଜୀଉରାଡ଼େଃରେନ୍‌ହ ହିସାପେ ହବାଅଥା, ଏନାଲେ ସାରିତାନା ।

୮ ☆ହେ ହାଗା ମିଶିକ, ଏସିଆ ଦିଶୁମ୍‌ରେ ଆଲେୟାଃ ଚେତାନରେ ହବାକାନ୍ ସାସାତି କାଜିକ ଆଲେ ଆପେକେ ଉଦୁବ୍ ନାଗେନ୍ତେଲେ ସାନାଙ୍ଗତାନା, ଚିୟାଃଚି ଏନାଦ ଆଲେୟାଃ ସାହାତିଙ୍ଗରାଃ ପେଡ଼େଃହେତେ ଆଦ୍‌କା ହାମ୍‌ଲ୍ ଆତଃ କା ସାହାତିଙ୍ଗୟ୍‌ଃ ଲେକା ତାଇକେନା, ଏନାତେ ଜୀଉବାଞ୍ଚାଅଥରାଃ ଆସ୍ତା ହଗି କା ତାଇକେନା ।^୯ ଆଲେକେ ଗନଏଃରାଃ ହୁକୁମ୍ ଏମାକାନା ମେନ୍ତେଲେ ଉଡ଼ୁକାଦ୍ ତାଇକେନା, ମେନ୍‌ଦ ଆଲେ ଆପାନାଃ ଚେତାନରେ କା ଆସ୍ତାକେଦ୍‌ତେ ଗଏଃକାନକକେ ଜୀଉବିରିଦ୍‌କାଦ୍ ପାର୍‌ମେଶ୍‌ବାର୍‌ତାଃରେ ଆସ୍ତା ଦହ ନାଗେନ୍ତେ ନେ ସବେନାଃ ହବାକାନା ।^{୧୦} ନେ ଲେକାନ୍ ବରଞ୍ଜାନ୍ ଗନଏଃହେତେ ଇନିଃ ଆବୁକେ ବାଞ୍ଚାଅକାଦ୍‌ବୁଆ ଆତଃ ବାଞ୍ଚାଅକାତେବୁଆଏ । ଇନିଃ ଆତଃଚି ଆବୁକେ ବାଞ୍ଚାଅବୁଆ, ନେ ଆସ୍ତା ଆବୁଆଃ ଇନିଃତାଃରେ ମେନାଃ ।^{୧୧} ଆତଃ ଆପେ ସବେନ୍‌କ ଆଲେ ନାଙ୍ଗ୍ ବିନ୍ତିକେଦ୍‌ତେ ଦେଙ୍ଗାଲେପେ । ଏନାରେ ଆଲେ ନାଗେନ୍ତେ ପୁରାଃ ବିନ୍ତିୟାଃତାନ୍ ବିନ୍ତିରାଃ କାଜିରୁହାଡ଼ ନାମଃଆ ଆତଃ ପାର୍‌ମେଶ୍‌ବାର୍ ଆଲେକେ ବାର୍‌ଦାନ୍ ଏମାଲେୟାଏ । ଆଲେ ନାଗେନ୍ତେ ପୁରାଃ ହଡ଼କ ପାର୍‌ମେଶ୍‌ବାର୍‌କେ ଧାନପାବାଦକ ଏମାଲୟା ।

ପାଉଲୁସଆଃ ଉଡ଼ୁରାଃ ବାଦ୍‌ଲାଅ

୧୨ ନେ ଅତେଦିଶୁମ୍‌ରେ ଜୀଦାନ୍ ଆତଃ ବିଶେଷ୍‌କେଦ୍‌ତେ ଆପେଲଃ ଆଲେୟାଃ ନାତା ପାର୍‌ମେଶ୍‌ବାର୍ ଏମାକାଦ୍ ପାବିତାର୍ ଆତଃ ପାତିୟାର୍‌ରେନ୍ ହରାତେ ହବାକାନା ମେନ୍ତେ ଆଲେୟାଃ ବିବେକ୍ ଗାଞ୍ଜା ଏମେତାନାଏ । ଏନାମେନ୍ତେ ଆଲେ ଆପାନ୍‌କେ ମାରାଙ୍ଗ୍ ମେନ୍ତେଲେ କାଜିନ୍‌ତାନା । ହଡ଼କଆଃ ସେଣ୍‌ନ୍‌ତେଦ

☆ ୧:୮ ୧:୮ ୧ କବିଚ୍ଛିନ୍ଦ ୧୫:୩୨.

କାହା, ମେନ୍ଦ ପାର୍ମେଶ୍ଵାରଆଃ ସାୟାଦରାଃ ପେଡ଼େଃତେ
 ନେଆଁଲେ କାମି ଦାଡ଼ିତାନା ।^{୧୩} ଅକ୍ନାଃ ଆପେ ପାଢ଼ାଅକେଦ୍ତେ
 ଆଟ୍‌କାର୍‌ଉରୁମ୍ ଦାଡ଼ିୟାପେ, ଆଲେ ଇମନାଙ୍ଗ୍ ଏସ୍‌କାର୍
 ଆପେତାଃତେ ଅଲେତାନାଲେ । ଆଇଙ୍ଗ୍ ଆସ୍ତା ତାନିଙ୍ଗ୍,^{୧୪} ନାହାଁଃ
 ଆପେ ଅକ୍ନାଃ କାଟିଃ ଲେକାଗିପେ ଆଟ୍‌କାର୍‌ଉରୁମେ ତାନା,
 ଏନା ଆବୁଆଃ ପ୍ରାଭୁ ଯୀଶୁଆଃ ହିନିଜୁଃ ଦିପିଲିରେ ପୁରାଃଗିପେ
 ଆଟ୍‌କାର୍‌ଉରୁମେୟା । ଏନାରେଦ୍, ଆପେ ଆଲେ ନାଗେନ୍ତେ
 ଆପାନ୍‌କେ ମାରାଙ୍ଗ୍ ମେନ୍ତେପେ କାଜିନା ଆତଃ ଆଲେୟ ଆପେ
 ନାଗେନ୍ତେ ଆପାନ୍‌କେ ମାରାଙ୍ଗ୍ ମେନ୍ତେଲେ କାଜିନା ।

^{୧୫} ଆଇଙ୍ଗ୍ ନେ ବିଷାଏରେ ସାର୍‌ତିଗି ସାରିତାଇକେନ୍ ହରାତେ
 ସିଦାତେ ଆପେତାଃତେ ସେନ୍ ନାଗେନ୍ତେଇଙ୍ଗ୍ ମନେ ତାଇକେନା
 । ଏନାତେ ଆପେ ବାର୍‌ସାତେ ଆଗିଷ୍‌ପେ ନାମାକାତେତେୟାଃ
 ।^{୧୬} ☆ଆଇଙ୍ଗ୍ ମାକିଦନିଆ ସେନ୍ ଇମ୍‌ତା ଆତଃ ଏନ୍ତାଃଏତେ
 ରୁହାଡ଼୍ ଇମ୍‌ତା ଆପେତାଃତେ ଚିମିନ୍ ମାହାଁ ତାଇନଃ ନାଗେନ୍ତେଇଙ୍ଗ୍
 ଉଡ଼ୁକାଦ୍ ତାଇକେନା, ଚିୟାଃଚି ଯିହୁଦା ରାଇଜ୍‌ତେ ହରାସେନ୍
 ନାଗେନ୍ତେ ଆପେୟାଃ ଦେଙ୍ଗାଇଙ୍ଗ୍ ସାନାଙ୍ଗ୍ ତାଇକେନା ।
^{୧୭} ଆପେ ଚିନାଃପେ ଉଡ଼ୁତାନା ? ଆଇଙ୍ଗ୍ ଚିନାଃ କା ସାରିଲେକା
 କାମିତାଇୟାକ ବାଇୟାକାଦ୍ ତାଇକେନାଇଙ୍ଗ୍ ? ଅକନ୍‌କ ମିସାତେ
 ହ୍, ହ୍ ଆତଃ କାହା, କାହା ମେନ୍ତେକ କାଜିୟାଃ, ଏନ୍ ହଡ଼କ ଲେକା
 ଚିନାଃ ଆଇଙ୍ଗ୍ ଆପ୍‌ନାଃ ବୁଗିନାଃ ନାଗେନ୍ତେ ଏସ୍‌କାର୍ କାମିତାଇୟା
 ବାଇୟାକାଦାଇଙ୍ଗ୍ ?^{୧୮} ସାର୍‌ତିଗି ପାର୍ମେଶ୍ଵାର୍ ପାଡ଼ିୟାରାଃ
 ଲେକାନ୍‌ନିଃ ତାନିଃ, ଆଇଙ୍ଗ୍ ଆପେକେ କାଜି ଏମ୍ ଇମ୍‌ତା ଚିତଲାଅ
 ମନ୍‌ତାୟାଃକେ କାଇଙ୍ଗ୍ ନେତେହେନ୍ତେ ।^{୧୯} ☆ପାର୍ମେଶ୍ଵାର୍‌ଆଃ
 ହନ୍ ଯୀଶୁ ଖ୍ରୀଷ୍ଟ୍, ଅକ୍‌ଏକେଚି ଆଇଙ୍ଗ୍, ସିଲାସ୍, ଆତଃ ତୀମଥ୍
 ଆପେତାଃତେ ଉଦୁଦ୍‌କାଇ ତାଇକେନାଲେ, ଇନିଃ “ହ୍” ଆତଃ
 “କାହା” ନାହାଲିଃ, ମେନ୍ଦ୍ ଇନିଃ ପାର୍ମେଶ୍ଵାର୍‌ଆଃ “ହ୍” ତାନିଃ ।
^{୨୦} ପାର୍ମେଶ୍ଵାର୍‌ଆଃ ସବେନ୍ ବାନାର୍‌ସା ନାଗେନ୍ତେ ଯୀଶୁ ଖ୍ରୀଷ୍ଟ୍ “ହ୍”
 ତାନିଃ । ଏନା ନାଗେନ୍ତେ ଯୀଶୁ ଖ୍ରୀଷ୍ଟ୍‌ଆଃ ହରାତେ ପାର୍ମେଶ୍ଵାର୍‌ଆଃ
 ମାନାରାଙ୍ଗ୍ ନାଙ୍ଗ୍ “ଆମେନ୍” କାଜିୟାଃରୁ ।^{୨୧} ପାର୍ମେଶ୍ଵାର୍

☆ ୧:୧୭ ୧:୧୭ ପ୍ରେରିଡ଼ ୧୯:୨୧. ☆ ୧:୧୯ ୧:୧୯ ପ୍ରେରିଡ଼ ୧୮:୫.

ଆଇଃକ୍‌ଗି ଯୀଶୁ ଖ୍ରୀଷ୍ଟତାଃରେ ଆପେୟାଃ ଆତଃ ଆଲେୟାଃ ଜୀଦାନକେ ମିଦରେ ମେସାକେଦ୍‌ତେ, ଆବୁକେ ଆଭିଷେକ୍ କାଦ୍‌ରୁଆ । ୨୨ ଇନିଃ ଆବୁକେ ଆପାନକାଦ୍‌ରୁଆ ଆତଃ ଆବୁଆଃ ମନ୍‌ସୁରୁଦ୍‌ରେ ଆୟାଃ ପାବିତାର୍ ଆମ୍‌କେ ଠାହାରାଅକିଃ ହରାତେ ଆବୁଆଃ ଚେତାନରେ ପାର୍‌ମେଶ୍‌ବାର୍‌ଆଃ ଆକ୍‌ତେୟାର୍‌ରେୟାଃ ଚିହ୍ନାଁ ଆତଃ ହିଜୁଃ ଦିପିଲିରେ ଆବୁ ଅକ୍‌ନାଃ ନାମେୟାଃରୁ ଏନା ସାର୍‌ତିଗି ତାନାଃ ।

୨୩ ପାର୍‌ମେଶ୍‌ବାର୍ ଆଇଁୟାଃ ଗାଞ୍ଜା ତାନିଃ । ଇନିଃ ଆଇଁୟାଃ ମନ୍‌ସୁରୁଦ୍ ସାରିୟାଏ । ଆଇଙ୍ଗ୍ ଆପେକେ ଆତଃ ଦୁକୁ କାଇଙ୍ଗ୍ ଏମାପେୟା, ଏନାମେନ୍ତେ ଆଇଙ୍ଗ୍ କରିଛିତେ ସେନ୍ ନାଙ୍ଗ୍ କାଇଙ୍ଗ୍ ସାନାଙ୍ଗ୍‌କେଦା । ୨୪ ଆପେ ଅକନ୍ କାଜି ବିଶ୍ୱାସେୟାପେ, ଏନ୍ ବିଷାଏରେ ଆପେ ଚେତାନରେ ଆକ୍‌ତେୟାର୍ ରିକାଏ ନାଗେନ୍ତେ ଆଲେ କାଲେ ସାନାଙ୍ଗ୍‌ତାନା, ଚିୟାଃତି ଆପେ ବିଶ୍ୱାସ୍‌ରେ ତିଙ୍ଗ୍‌କେଚେଦ୍‌କାନାପେ । ମେନ୍‌ଦ ଆପେକେ ସୁକୁଇଚିପେ ନାଗେନ୍ତେ ଏସ୍‌କାର୍ ଆପେଲଃ ମିସାତେ ଆଲେ କାମିତାନାଲେ ।

୨

୧ ଆଇଙ୍ଗ୍ ଆପେତାଃତେ ସେନ୍‌ତେୟାଃ ଆପେ ନାଗେନ୍ତେ ଦୁକୁରାଃ କାଜିତାନାଃରେଦ୍, ଆଇଙ୍ଗ୍ ଆପେତାଃତେ ଆତଃ ଚିତ୍‌ଲାଅ କାଇଙ୍ଗ୍ ସେନା ମେନ୍ତେ ମନ୍‌ରେଇଙ୍ଗ୍ ଉଡ଼୍‌ଖୁକାଦା । ୨ ଆପେକେ ଦୁକୁ ଏମାପେରେ, ଅକଏ ଆଇଙ୍ଗ୍‌କେ ରାସ୍‌କା ଏମାଇୟାଏ ? ଆପେକେ ବାଗିକେଦ୍‌ତେ ଆତଃ ଏନ୍‌ଲେକା ଜେତାଏ ବାଙ୍ଗ୍‌କଆ । ୩ ଏନାମେନ୍ତେ ଆଇଙ୍ଗ୍ ଆପେତାଃତେ ଏନ୍ ଚିଟାଉ ଅଲାକାଦ୍ ତାଇକେନାଇଙ୍ଗ୍, ଆଇଙ୍ଗ୍ ଏନ୍ତାଃତେ ସେନ୍‌ରେ, ଅକନ୍ ହଡ଼କଆଃ ନାଗେନ୍ତେ ଆଇଁୟାଃ ସୁକୁହବାୟାଃତେୟାଃ, ଇନ୍‌କୁଆଃ ହରାତେ ଆଇଙ୍ଗ୍ ଜେ'ଲେକା ଦୁକୁ ଆଲକାଇଙ୍ଗ୍ ନାମେକା । ସାର୍‌ତିଗି ଆଇଁୟାଃ ପୁରାଃ ବିଶ୍ୱାସ୍ ମେନାଃ, ଆଇଁୟାଃ ରାସ୍‌କାରେ ଆପେୟାଃ ରାସ୍‌କା ମେନାଃ । ୪ ପୁରାଃ ଦୁକୁ ଆତଃ ମନ୍‌ସୁରୁଦ୍‌ରାଃ ହାସୁତେ ରାଆଃତାନଲଃ ଆଇଙ୍ଗ୍ ଅକ ଚିଠି ଅଲାକାଦ୍ ତାଇକେନାଇଙ୍ଗ୍, ଏନା ଆପେକେ ଦୁକୁଇଚିପେ ନାଗେନ୍ତେ କାଇଙ୍ଗ୍ ଅଲ୍, ମେନ୍‌ଦ ଆପେକେ

ଆଇଁଜ୍ ଚିମିନ୍ ଦୁଲ୍ଲାଡ଼ପେ ତାନାଇଁଜ୍, ଏନା ଉଦୁବ୍ ନାଗେନ୍ତେଇଁଜ୍
ଅଲ୍ଲାଇକାଦ୍ ତାଇକେନା ।

ଏଡ଼କାନ୍ ହଡ଼କକେ ଛାମାକପେ

* ଆପେକଏତେ ଜେତାଏ ମିହୁଡ଼କେ ଦୁକୁ ଏମାକାଇରେଦ, ଇନିଃ
ଆଇଁୟାଃ ମନ୍ରେ ଏସ୍କାର୍ ଦୁକୁ କାଏ ଏମ୍, ମେନ୍ଦ ହୁଡ଼ିଜ୍ ଲେକା
ଆପେ ସବେନ୍କକେହିଁ ଦୁକୁ ଏମାକାଦପେୟାଏ । ^୬ ଆପେକଏତେ
ଚିମିନ୍ ହଡ଼କ ଏନ୍ ହଡ଼କେ ସାଜାଇ ଏମ୍କିୟାପେ, ଏନା ଇନିୟାଃ
ନାଗେନ୍ତେ ପୁରାଃଗିୟା । ^୭ ଇନିଃ ପୁରାଃଗି ଆଲ୍ଲକାଏ ଦୁକୁଃକା, ଏନା
ନାଗେନ୍ତେ ନାହିଁଃ ଇନିଃକେ ଛାମା ଆତଃ ଜୀଉରାଡ଼େଃ ଆପେକେ
ଏମ୍ ଲାଗାତିକ୍‌ୟାଁଃ । ^୮ ଆଇଁଜ୍ ଆପେକେଇଁଜ୍ ବିନ୍ତିପେତାନା,
ଆପେ ଇନିଃକେ ସାର୍ତିଗି ଦୁଲ୍ଲାଡ଼ତାନାପେ ମେନ୍ତେ ଇନିଃକେ
ଉଦୁବାଇପେ । ^୯ ଆପେ ସବେନ୍ କାଜିକ ମାନାତିକ୍ ତାନାପେ
ଚି କାହା, ଏନା ସାରି ନାଗେନ୍ତେ ଆଇଁଜ୍ ଏନ୍ ଚିଟାଉ ଅଲ୍ଲାଇକାଦ୍
ତାଇକେନାଇଁଜ୍ । ^{୧୦} ଆପେ ଜେତାଏକକେପେ ଛାମାକରେଦ,
ଆଇଁଜ୍‌ହିଁ ଇନ୍‌କୁକେ ଛାମାକଆଇଁଜ୍ । ଆଇଁଜ୍ ଜେତା କାଜି
ନାଗେନ୍ତେଇଁଜ୍ ଛାମାକରେଦ, ଏନା ଖ୍ରୀଷ୍ଟୁଆଃ ସାମ୍‌ନାକ୍‌ରେ
ଆପେୟାଃ ହରାତେ ଛାମାଅଃଆ । ^{୧୧} ସାଏତାନ୍ ଆରୁଆଃ ବିରୁଧ୍‌ରେ
ଜେତାନ୍ କାମିରିକା ନାଗେନ୍ତେ ନେତା ଆଲ୍ଲକାଏ ନାମେକା, ଚିୟାଃଚି
ଆରୁ ଇନିୟାଃ ସବେନ୍ କାମିତାୟାଃ ସାରିୟାଃବୁ ।

^{୧୨} ☆ଆଇଁଜ୍ ଖ୍ରୀଷ୍ଟୁଆଃ ସୁକୁକାଜି ଉଦୁବ୍ ନାଗେନ୍ତେ ତ୍ରେୟାସ୍‌ତେ
ସେଟେରୟାନ୍‌ଲଃ, ନେ କାମି କାମି ନାଗେନ୍ତେ ପ୍ରାଭୁ ହରା
ନିଜାକାଦାଏ ମେନ୍ତେ ଆଟ୍‌କାର୍‌କେଦାଇଁଜ୍ । ^{୧୩} ମେନ୍ଦ ଆରୁଆଃ
ହାଗା ତିତସକେ ଏନ୍ତାଃରେ କା ନେଲ୍‌କେଦତେ, ଆଇଁଜ୍ ମନ୍ରେ
କାଇଁଜ୍ ସୁକୁୟାନା । ଏନାତେ ଏନ୍ତାଃରେନ୍ ହଡ଼କତାଃଏତେ
ମାକିଦନିଆଡେଇଁଜ୍ ସେନଃୟାନା ।

ଖ୍ରୀଷ୍ଟୁ ହରାତେ ଜିନିତାଅ

^{୧୪} ପାରମେଶ୍ୱାରୁଆଃ ଧାନ୍ୟାବାଦ୍ ହବାଅଃକା । ଚିୟାଃଚି ଇନିଃ
ୟାଶୁ ଖ୍ରୀଷ୍ଟୁଲଃ ମେସାକାନ୍ ହରାତେ ସବେନ୍ ଇମ୍‌ତା ଆରୁକେ
ଜିନିତାଅ ହରାତେ ସୁତୁଃଇଦିୟାଃ । ଆତଃ ବୁଗିନ୍ ସହାନ୍

ଚାରିୟସାଃତେ ପାସରାଅଃ ଲେକା ଖ୍ରୀଷ୍ଟୁଆଃ ସେଣାଁ ଏଟାଃକକେ ଏମ୍ ନାଗେନ୍ତେ ପାର୍ମେଶ୍ୱାର୍ ଆବୁକେ ବେଭାରୁ ତାନା ।
 ୧୫ ଚିୟାଃଚି ଆବୁ ଖ୍ରୀଷ୍ଟୁ ହରାତେ ପାର୍ମେଶ୍ୱାର୍‌ଆଃ ନାଗେନ୍ତେ ଚାଡ଼ାଅକାନ୍ ବୁଗିନ୍ ସହାନ୍ ଲେକାନ୍‌କ ତାନ୍‌ବୁ । ଅକ୍‌ନାଃଚି ଅକନ୍‌କ ଜୀଉବାଞ୍ଚାଅକ ନାମେତାନା ଆତଃ ଅକନ୍‌କ ଜିୟନଃ ହରାରେକ ସେନ୍‌ତାନା, ଇନ୍‌କୁଆଃ ଆଲ୍‌ରେ ପାସରାଅଃ ତାନା । ୧୬ ଗନଏଃ ହରାତେ ସେନଃତାନ୍ ହତ୍‌କତାଃରେ ନେ ବୁଗିନ୍ ସହାନ୍ ଗନଏଃ ଲେକାନାଃ ତାନାଃ, ମେନ୍‌ଦ ଜୀଉବାଞ୍ଚାଅ ନାମାକାଦ୍ ହତ୍‌କତାଃରେ ନେ ବୁଗିନ୍ ସହାନ୍ ଜୀଦାନ୍ ଏମାଃଏ । ମେନ୍‌ଦ ନେ କାମି ରିକାଏ ଲେକାନ୍‌ନିଃ ଅକଏ ତାନିଃ ? ୧୭ ପୁରାଃ ହତ୍‌କ ଆପାନାଃ ପସାଅଃ ନାଗେନ୍ତେ ପାର୍ମେଶ୍ୱାର୍‌ଆଃ ସୁକୁକାଜିକେକ ବେଭାରୁତାନା । ଆଲେ ଇନ୍‌କୁ ଲେକା ନାହାଁଲାଃଲେ । ଆଲେକେ ପାର୍ମେଶ୍ୱାର୍ କୁଲାକାଦ୍ ହରାତେ ଆଲେ ପାତିୟାରଃ ଲେକା ଆୟାଃ କାଜିଲେ ମାନାତିକ୍‌ତାନା ଆତଃ ପାର୍ମେଶ୍ୱାର୍‌ଆଃ ସାମ୍‌ନାକ୍‌ରେ ଖ୍ରୀଷ୍ଟୁଆଃ ଦାସି ଲେକାଲେ କାଜିତାନା ।

୩

ନାଞ୍ଜା ନିୟାମ୍‌ରେନ୍ ଦାସିକ

୧ ଆଲେ ଚିୟାଃ ଆପାନ୍‌କେ ମାରାକ୍‌ୟେନ୍‌ତାନ୍ ଲେକାଲେ ଆଟ୍‌କାରଃତାନା ? ଚାଏ, ଏଟାଃକ ଲେକା ଆଲେ ଚିନାଃ ଆପେତାଃତେ ଚାଏ ଆପେତାଃଏତେ ପାରିଚାଏ ଅନଲ୍ ଚିଠିଲେ ଆସିତାନା ? ୨ ଆପେଗି ଆଲେୟାଃ ପାରିଚାଏ ଅନଲ୍ ଚିଠି ତାନ୍‌ପେ, ଆଲେୟାଃ ମନ୍‌ସୁରୁଦ୍‌ରେ ଅଲ୍‌କାନ୍ ଚିଠି ତାନ୍‌ପେ, ଅକ୍‌ନାଃକେଚି ସବେନ୍ ହତ୍‌କ ସାରିତାନା ଆତଃ ପାଢ଼ାଅ ଦାଡ଼ିତାନା । ୩ ନେ ପାରିଚାଏ ଚିଠି ଖ୍ରୀଷ୍ଟୁ ଆଇଃକ୍‌ଗି ଅଲ୍‌କାଦା ଆତଃ ଆବୁଆଃ ସୁସାର୍ ହରାତେ ଏନା କୁଲଃତାନା । ନେଆଁ ଚାକାର୍ ଦିରିରେ ସିହାଇତେ କା ଅଲ୍‌କାନା, ମେନ୍‌ଦ ଜୀନିଦ୍ ପାର୍ମେଶ୍ୱାର୍‌ଆଃ ଆମ୍‌ ହରାତେ ମାନଃଞ୍ଜାରାଃ ମନ୍‌ସୁରୁଦ୍‌ରେ ଅଲ୍‌କାନା ।

୪ ଖ୍ରୀଷ୍ଟୁଆଃ ହରାତେ ପାର୍ମେଶ୍ୱାର୍‌ଆଃ ଚେତାନ୍‌ରେ ଭାର୍‌ସାକେଦ୍‌ତେ ଆଲେ ନେ ସବେନାଃଲେ କାଜିଦାଡ଼ିତାନା ।
 ୫ ଆଲେତାଃରେ ନେ ଲେକା କାଜି ଚାଏ କାମି ଦାଡ଼ିରେୟାଃ ପେଡ଼େଃ

ମେନାଃ ମେନ୍ତେ ଆଲେ ଜେତାଲେକାତେ କାଜି କାଲେ ଦାଡ଼ିୟା,
 ଚିୟାଃଚି ଆଲେକେ କାଜିରେୟାଃ ପେଡ଼େଃ ପାର୍ମେଶ୍ଵାର୍ତାଃଏତେ
 ହିଜୁଃଆ । ୨ ନାଞ୍ଜା ରାଜିନାମାକେ ଉଦୁବ୍ ନାଗେନ୍ତେ ପାର୍ମେଶ୍ଵାର୍
 ଆବୁକେ ସୁସାରରେ କାମି ଦାଡ଼ିୟାଃକ ଲେକାଏ ହବାକାଦବୁଆ । ନେ
 ନିୟାମ୍ ଅନଲ୍ତେୟାଃ ନାହାଁଲାଃ, ମେନ୍ଦ୍ ଆମ୍ବାତେ ବାଇୟାକାନା,
 ଚିୟାଃଚି ଅନଲ୍ ନିୟାମ୍ ଗନ୍ଏଃ ଆଉଞ୍ଜେୟାଏ, ମେନ୍ଦ୍ ଆମ୍ବା
 ଜୀଦାନ୍ ଏମାଃଏ ।

୩ ମୁଣା ନାବୀଆଃ ଆନ୍ତୁ ଦିରି ତେତାନ୍ରେ ଖଦାକାନ୍ ତାଇକେନା
 । ଏନାରେ ପାର୍ମେଶ୍ଵାର୍ଆଃ ସେଞ୍ଜାକାମିରେ ନେ'ଲେକା ମାନାରାଙ୍ଗ୍
 ଉଦୁବାକାନ୍ ତାଇକେନା । ଆତଃ ଏନ୍ ମାନାରାଙ୍ଗ୍ରେୟାଃ
 ମାର୍ସାଲ୍ରେୟାଃ ରାଁପ୍ ତେଜ୍ କା ତାଇକେନ୍ରେୟା, ଇସ୍ରାଏଲ୍ ହଡ଼କ
 ମାସ୍ତାଲ୍ସାଃତେ କାକ ନେଲ୍ ଦାଡ଼ିକେଦା । ଗନ୍ଏଃ ଆଉଞ୍ଜେତାନ୍
 ଆନ୍ତୁ ନେ'ଲେକା ହବାଅଃତାନ୍ରେଦ, 「 ପାବିତାର୍ ଆମ୍ବାରାଃ
 ସେଞ୍ଜାକାମିକ ଏନାଏତେ ଚିମିନ୍ ପୁରାଃ ଆଦକା ମାନାରାଙ୍ଗ୍ରେ
 କା ହବାଅଃଆ ? ୯ ସାଜାଇ ନାମଃ ଆନ୍ତୁରାଃ ସେଞ୍ଜାକାମିରେ
 ନିମିନାଙ୍ଗ୍ ମାନାରାଙ୍ଗ୍ ହବାଅଃତାନ୍ରେଦ, ଜୀଉବାଞ୍ଚାଏ ଏମେତାନ୍
 ନିୟାମ୍ ବାଇୟାକାନ୍ତେୟାଃରାଃ ସେଞ୍ଜାକାମିରେ ଚିମିନ୍ ପୁରାଃ
 ଆଦକା ମାନାରାଙ୍ଗ୍ କା ହବାଅଃଆ ? ୧୦ ଆବୁ କାଜି ଦାଡ଼ିୟାବୁ,
 ମାସ୍ତାଲ୍ରେୟାଃ ମିଆଁଦ୍ ମାନାରାଙ୍ଗ୍ ହବାୟାନ୍ ହରାତେ,
 ସିଦା ଦିପିଲିରେ ତାଇକେନ୍ ମାନାରାଙ୍ଗ୍ ନାହାଁଃ ବାନଃଆ ।
 ୧୧ ଚିୟାଃଚି ଘାଡ଼ିକାଦଗି ତାଇନଃ ବିଷାଏ ନିମିନାଙ୍ଗ୍ ମାନାରାଙ୍ଗ୍
 ହବାଅଃତାନ୍ରେଦ, କା ଟୁଣ୍ଡୁ ବିଷାଏ ନେଆଁଏତେ ଚିମିନ୍ ପୁରାଃ
 ଆଦକାତେ ମାନାରାଙ୍ଗ୍ କା ହବାଅଃଆ ?

୧୨ ଆବୁଆଃ ଏନ୍ ଆସ୍ରା ମେନାଃ ଏନାମେନ୍ତେ ଆବୁ ଜୀଉରେ
 କେଟେଦ୍କେଦ୍ତେ ମେନାବୁଆ । ୧୩ ଆବୁ ମୁଣା ନାବୀ
 ଲେକା ନାହାଁଲାବୁ । ଏନ୍ ମାସ୍ତାଲ୍ରେୟାଃ ରାଁପ୍ରେୟାଃ ତେଜ୍
 କାମ୍ତାୟାଃତେୟାଃ ଇସ୍ରାଏଲ୍ ହଡ଼କ ଆଲକାକ ନେଲେକା
 ମେନ୍ତେ ଇନିଃ ଆୟାଃ ମଚା ଦାପାଲ୍କାଦ୍ ତାଇକେନାଏ ।
 ୧୪ ସାର୍ତି କାଜିଲେରେ, ଇନ୍କୁଆଃ ଆୟୁମ୍ରେୟାଃ ଆତଃ
 ମନ୍ରେ ଆଟ୍ଟକାର୍ତ୍ତୁରେୟାଃ ପେଡ଼େଃ କା ତାଇକେନା ।
 ନାହାଁଃହଗି ମାରି ରାଜିନାମା ପାଞ୍ଚା ଇମ୍ତା ଇନ୍କୁଆଃ ମନ୍କ

ଦାପାଲାକାନା । ଯଶୁ ଶ୍ରୀଷ୍ଟଲଃ ମେସାନ୍ ହରାତେ ଏସ୍କାର୍ ଏନ୍ ଦାପାଲାକାନ୍ତେୟାଃ ଆତମଃଆ । ୧୫ ନାହାଁଃହରି, ଏନ୍ ମୁଣା ନାବୀଆଃ ଆନ୍ତୁକେ ପାଢ଼ାଅତାନ୍ ଇମତା ଇନ୍କୁଆଃ ମନ୍ରେ ନାହାଁଃ ଜାକେଦ୍ ଦାପାଲାକାନା । ୧୬ ମେନ୍ଦ ଏନ୍ ଦାପାଲାକାନ୍ତେୟାଃ ହରି ଆତମ୍ ଦାଡ଼ିୟଃଆ । ଚିୟାଃତି ଧାରାମ୍ପୁଅରେ ଅଲାକାନା, “ପ୍ରାଭୁସାଃତେ ହେତାରୁହାଡ଼ଲେରେ, ଏନ୍ ଦାପାଲାକାନ୍ତେୟାଃ ଆତମଃଆ ।” ୧୭ ନାହାଁଃଦ, “ପ୍ରାଭୁ” ଆମ୍ ତାନିଃ । ଆତଃ ପ୍ରାଭୁଆଃ ଆମ୍ ତାଇନ୍ତାଃରେ, ତନଲ୍ ବାନଆଃ । ୧୮ ଆବୁ ସବେନ୍କଆଃ କା ହାରୁବାକାନ୍ ମେଦମୁହାଁଡ଼ରେ ନାହାଁଃ ପ୍ରାଭୁଆଃ ମାନାରାଙ୍ଗ୍ ଚାମକାଅଃତାନା ଆତଃ ଏନ୍ ମାନାରାଙ୍ଗ୍ ପ୍ରାଭୁତାଃଏତେ ହିଜୁଃତାନା, ଆତଃ ଆବୁ ପୁରାଃଗି ମାସ୍ମାଲଃତାନ୍ଲଃ ଆୟାଃ ରୁପ୍ ଲେକାରୁ ବାଦଲ୍ୟାଅଃତାନା । ଚିଆଃତି ପ୍ରାଭୁଗି ଆମ୍ ତାନିଃ ଆତଃ ଆୟାଃ ହରାତେ ନେ ସବେନାଃ ହବାଅଃତାନା ।

୪

ହସା ଚାଟୁରେ ସିର୍ମାରେୟାଃ ଖୁଜ୍

୧ ପାର୍ମେଶ୍ଵାର୍ ଆୟାଃ ଦାୟାତେ ଆଲେକେ ନେ ସେଞ୍ଜାକାମି ଏମାକାଦ୍ଲେ ନାଗେନ୍ତେ ଆଲେ କାଲେ ହୁଡ଼ିଙ୍ଗ୍ଜୀଉକାନା । ୨ ଆଲେ ଉକୁଆକାନ୍ ଆତଃ ଗିହୁଗାନ୍ କାଜିକାମିକଲେ ବାଗିକେଦା । ଆଲେ କାଲେ ବେଦାତାନା ଚାଏ ପାର୍ମେଶ୍ଵାର୍ଆଃ ବାଚାନ୍କେ ବାଗିକେଦ୍ତେ ଏଟାଃ ଲେକା ମୁଣ୍ଡି କାଲେ କାଜିତାନା । ମେନ୍ଦ ପାର୍ମେଶ୍ଵାର୍ଆଃ ନେପେଲ୍ରେ ଆଲେ ସାନାର୍ଡ଼ିରେୟାଃ ପୁରା ମାସ୍ମାଲ୍ରେଲେ ସେସେନ୍ତାନା, ଆତଃ ହଡ଼କଆଃ ବିବେକ୍ ଆୟାର୍ରେ ଆଲେ ଆପାନ୍କେ ମାଇନ୍ ନାମଃ ନାଗେନ୍ତେଲେ ସାନାଙ୍ଗ୍ତାନା । ୩ ଚିୟାଃତି ଆଲେୟାଃ ହରାତେ ଉଦୁବାକାନ୍ ସୁକୁକାଜି ଦାନାଙ୍ଗ୍ଆକାନ୍ରେଦ୍, ଏନା ଜିୟନଃତାନ୍ ହଡ଼କ ନାଗେନ୍ତେ ଏସ୍କାର୍ ଦାନାଙ୍ଗ୍ଆକାନା । ୪ ଇନ୍କୁ କାକ ବିଶ୍ଵାସ୍ ତାନା, ଚିୟାଃତି ଇନ୍କୁଆଃ ମନ୍କେ ନେ ଅତେଦିଶ୍ଵମ୍କେ ରାଇଜେତାନ୍ ସାଏତାନ୍ ନୁବାଃକାଦାଏ । ଶ୍ରୀଷ୍ଟ, ଅକଏତି ପାର୍ମେଶ୍ଵାର୍ଆଃ ମିଦସାମାନ୍ ରୁପ୍ ତାନିଃ, ଇନିୟାଃ ମାନାରାଙ୍ଗ୍ ବିଷାଏରେ ସୁକୁକାଜିହେତେ ହିଜୁଃତାନ୍ ମାସ୍ମାଲ୍କେ ଇନ୍କୁ ଆଲକାକ

ନେଲେକା ମେନ୍ତେ ସାଏତାନ୍ ନୁବାଃକାଦାଏ । ୫ ଚିୟାଃଚି ଆଲେ ଆପାନ୍‌କେଗି କାଲେ ଉଦୁବ୍‌ତାନା, ମେନ୍‌ଦ ଶ୍ରୀଷ୍ଟଗି ପ୍ରାଭୁ ତାନିଃ ମେନ୍ତେ ଆଡଃ ଯୀଶୁଆଃ ନାଗେନ୍ତେ ଆଲେ ଆପାନ୍‌କେ ଆପେୟାଃ ଦାସିକତାନ୍‌ଲେ ମେନ୍ତେଲେ ଉଦୁବ୍‌ତାନା । ୬ ଚିୟାଃଚି ଅକନ୍ ପାରମେଶ୍ଵାର୍, “ନୁବାଃଏତେ ମାର୍ସାଲ୍ ହବାଅଃକା” ମେନ୍ତେ କାଜିକାଦ୍ ତାଇକେନାଏ, ଏନ୍ ପାରମେଶ୍ଵାରଗି, ଶ୍ରୀଷ୍ଟଆଃ ମେଦ୍‌ମୁହାଁଡ଼ରେ ମାସ୍ମାଲଃତାନ୍ ପାରମେଶ୍ଵାରଆଃ ମାନାରାଙ୍ଗ୍ ସେଣ୍ଟାରେୟାଃ ମାର୍ସାଲ୍ ଉଦୁବ୍ ନାଗେନ୍ତେ ଆଲେୟାଃ ମନ୍‌ସ୍ତୁରୁଦ୍‌ରେ ମାସ୍ମାଲ୍‌କେଦା ।

୭ ମେନ୍‌ଦ ନେ ପୁରାଃ ମାରାଙ୍ଗ୍ ପେଡ଼େଃ ପାରମେଶ୍ଵାରଆଃ ତାନାଃ, ଆଲେୟାଃ ନାହାଁଲାଃ ନେଆଁ ଉଦୁବ୍ ନାଗେନ୍ତେ ଆଲେ ନେ ହାସାରେୟାଃ ଚାଟୁ ଲେକାନ୍‌କ ତାନ୍‌ଲେ, ଅକ୍‌ନାଃରେଚି ସିର୍ମାରେୟାଃ ଖୁଜ୍ ମେନାଃ । ୮ ଆଲେ ସବେନ୍ ଲେକାନ୍ ଦୁକୁହାସୁଲେ ନାମାକାଦା, ଏନ୍‌ରେୟ କାଲେ ଉୟୁଗାକାନା । ମିସାମିସା ଆଡଃଉଡ଼ଗୁଃ ତାଇକେନାଲେ, ଏନ୍‌ରେୟ କାଲେ ହୁଡ଼ିଙ୍ଗ୍‌ଜୀଉକାନା । ୯ ପୁରାଃ ବାଇରିକ ମେନାକଆ, ଏନ୍‌ରେୟ ଆଲେ ଗାତି ବାଙ୍ଗ୍‌କ ଲେକା ଚିଉଲାଅ କାଲେ ତାଇକାନା, ଆଡଃ ସିଗିଦଃ ତାଇକେନାଲେ, ଏନ୍‌ରେୟ ଆଲେ କାଲେ ଜିୟନାକାନା । ୧୦ ଯୀଶୁଆଃ ଜୀଦାନ୍ ଜେ'ଲେକା ଆଲେତାଃରେ ଉଦୁବଃଆ, ଏନାମେନ୍ତେ ଆଲେ ସବେନ୍ ଇମ୍‌ତା ଆଲେୟାଃ ହଡ଼ମ୍‌କରେ ଯୀଶୁଆଃ ଗନଏଃକେଲେ ଗଅଃକାଦା । ୧୧ ଯୀଶୁଆଃ ଜୀଦାନ୍‌ରେ ଆଲେୟାଃ ଗନଏଃ ହଡ଼ମ୍‌ରେ ନେଲଃକା ମେନ୍ତେ ଆଲେୟାଃ ଜୀନିଦ୍‌ରେ ଯୀଶୁ ନାଗେନ୍ତେ ବରଝାନ୍ ଗନଏଃରେ ସବେନ୍ ଇମ୍‌ତା ମେନାଲେୟା । ୧୨ ନେ ଲେକାତେ ଆଲେତାଃରେ ଗନଏଃ ଆଡଃ ଆପେତାଃରେ ଜୀଦାନ୍‌ରେୟାଃ କାମି କାମିତାନା ।

୧୩ ଧାରାମ୍‌ପୁଅରେ ଅଲାକାନା, “ଆଇଙ୍ଗ୍ ବିଶ୍ଵାସକାଦାଇଙ୍ଗ୍ ଏନାମେନ୍ତେଇଙ୍ଗ୍ କାଜିକାଦା ।” ଆଲେ ଏନ୍ ବିଶ୍ଵାସରେୟାଃ ଆମ୍ବା ନାମାକାଦ୍ ହରାତେ, ଆଲେୟା ବିଶ୍ଵାସକାଦାଲେ ଆଡଃ କାଜିତାନାଲେ । ୧୪ ଆଲେ ସାରିତାନାଲେ, ପାରମେଶ୍ଵାର୍ ପ୍ରାଭୁ ଯୀଶୁକେ ଗନଏଃହେତେ ଜୀଉବିରିଦ୍‌କିୟାଏ, ଏନ୍ ପାରମେଶ୍ଵାରଗି ଯୀଶୁଲଃ ଆଲେକେୟ ଜୀଉବିରିଦ୍‌ଲେୟାଏ ଆଡଃ ଆପେଲଃ ଆଲେକେ ଆୟାଃ ହେପାଦ୍‌ତେ ଇଦିଲେୟା । ୧୫ ଆପେୟାଃ ବୁଗିନାଃ

ନାଗେନ୍ଦ୍ର ନେ ସବେନାଃ ହବାଅଃତାନା । ପାର୍ମ୍ଭେଶ୍ୱରାଃ ସାୟାଦ୍
ଆତଃଗି ପୁରାଃତେ ହତ୍ୱକତାଃତେ ସେଚେରରେ, ଆତଃଗି ପୁରାଃ
ହତ୍ୱକ ପାର୍ମ୍ଭେଶ୍ୱରାଃ ମାନାରାଜ୍ ନାଜ୍ ଧାନ୍ୟାବାଦ୍ରେୟାଃ
ବିକ୍ରିକ ବିକ୍ରିୟା ।

ବିଶ୍ୱାସ୍ତେ ଜାନିଦ୍

୧୭ ଏନାମେନ୍ଦ୍ର ଆଲେ ଚିତ୍ତଲ୍ୟାଅ କାଲେ ହୁଡ଼ିଜ୍ଜୀଉ କାନା
। ଆଲେୟାଃ ନେଲଃତାନ ହତ୍ୱମ୍ ମାଡ଼ି ମାଡ଼ିତେ ଜିୟନଃ
ତାନା, ମେନ୍ଦ୍ ଆଲେୟାଃ ମନ୍ସୁରୁଦ୍ରେୟାଃ ଆମ୍ ଅକ୍ନାଃଚି
ପାର୍ମ୍ଭେଶ୍ୱରାଃତାଃଏତେ ନାମାକାନା ଏନା ମୁସିଜ୍ ମୁସିଜ୍ତେ
ନାଞ୍ଜାଇଦିୟାଃ ତାନା । ୧୭ ଆତଃ ନେ କାଚିଃ ଲେକାନ୍ ଦୁକୁ
ହାସୁ ଆଲେ ନାଗେନ୍ଦ୍ର କା ଜକାଃଅ ଜାନାଅରେୟାଃ ମାନାରାଜ୍
ଆଉଗାଲେ ତାନାଏ । ୧୮ ଚିୟାଃଚି ଆଲେ ନେଲଃତାନ ବିଷାଏକକେ
କା ନେଲ୍ଲକେଦ୍ତେ, କା ନେଲଃତାନ ବିଷାଏକକେ ନେଲ୍ଲତାନାଲେ,
ଚିୟାଃଚି ନେଲଃତାନ ବିଷାଏକ ହୁଡ଼ିଜ୍ ଦିପିଲିଗି ତାଇନାଃ, ମେନ୍ଦ୍
କା ନେଲଃତାନ ବିଷାଏକ ଜାନାଅ ଜାନାଅଗି ତାଇନାଃ ।

୫

୧ ମେନ୍ଦ୍ ଆଲେ ସାରିତାନାଲେ, ନେ ଅତେରେ ହତ୍ୱମ୍ ଲେକାନ୍
କୁମ୍ଭାରେ ଆବୁ ନାହାଃ ତାଇନଃତାନାବୁ, ଏନା ଜିୟନଃରେଦ୍,
ଆବୁକେ ପାର୍ମ୍ଭେଶ୍ୱର ସିର୍ମାରେ ମିଆଁଦ୍ ଜାନାଅଗି ତାଇନଃ
ନାଗେନ୍ଦ୍ର ଅଡ଼ାଃ ଏମାବୁଆଏ । ଏନାଦ୍ ହତ୍ୱତେ କା ବାଇକାନା,
ମେନ୍ଦ୍ ପାର୍ମ୍ଭେଶ୍ୱର ଆଇଃକ୍ଚି ଏନାକେ ବାଇୟାକାଦା ।
୨ ଆତଃ ନେ ଅତେରେୟାଃ ଅଡ଼ାଃରେ ତାଇନ୍କେଦ୍ତେ ଆବୁ
ଏନ୍ ସିର୍ମାରେୟାଃ ଅଡ଼ାଃ ଲେକାନ୍ ଲିଜାଃ ତୁସିଜ୍ଅଃ ନାଗେନ୍ଦ୍ର
ଆବୁଆଃ ଇଛାସାନାଜ୍ ମେନାଃ । ୩ ମେନ୍ଦ୍ ଏନ୍ ସିର୍ମାରେୟାଃ
ଅଡ଼ାଃ ଲେକାନ୍ ଲିଜାଃ ତୁସିଜ୍ଅରେଦ୍, ଆବୁ ସାମା ହତ୍ୱମିଗି କାବୁ
ନେଲଆଃ । ୪ ଆବୁ ନେ ସାଂସାରରେୟାଃ କୁମ୍ଭାରେ ତାଇନଃତାନ
ଇମ୍ତା ଲାଗାଉତାଃତାନଲଃ ମନ୍ସୁରୁଦ୍ରେ ରାଆଃ ଗେରାଜ୍
ତାନାବୁ । ଆବୁ ସାଂସାରରେୟାଃ ହତ୍ୱମ୍କେ ବାଗି ନାଗେନ୍ଦ୍ର ସାନାଜ୍
ତାନାବୁ ଏନାଦ୍ ନାହାଃ, ମେନ୍ଦ୍ ସିର୍ମାରେୟାଃ ଲିଜାଃ ତୁସିଜ୍
ହରାତେ ଆବୁଆଃ ନେ ସାଂସାରରେୟାଃ ହତ୍ୱମ୍ ଜେଲେକା କା

ଗଜଃ ଜୀଦାନରେ ବାଦଲାଅଃଆ, ଏନା ଆଲେୟାଃ ସାନାଙ୍ଗତାନା । ୫ ପାର୍ମେଶ୍ଵାର୍ ଆବୁକେ ନେ'ଲେକା ବାଦଲାଅ ନାଗେନ୍ତେ ବାଇସେକାଡ଼ା କାଦ୍‌ବୁଆ । ଆତଃ ଇନିଃ ଆୟାଃ ପାବିତାର୍ ଆମ୍ବାକେ କୁଲ୍‌କିଃଦ୍ ହରାତେ ଆବୁରେ ତାଇନଃ ନାଙ୍ଗ୍ ଏମ୍‌କିୟାଏ ।

୬ ଏନାମେନ୍ତେ ଆବୁ ସବେନ୍ ଇମ୍‌ତା ଜୀଉରେ କେଟେଦ୍‌କେଦ୍‌ତେ ମେନାବୁଆ, ଆବୁ ସାରି ତାନାବୁ, ଚିମିନ୍ ଦିନ୍ ଜାକେଦ୍ ନେ ହଡ଼୍‌ମରେ ମେନାବୁଆ, ଇମିନ୍ ଦିନ୍ ଜାକେଦ୍ ପ୍ରାଭୁତାଃଏତେ ସାଙ୍ଗିନ୍‌ରେ ତାଇନ୍କେଦ୍‌ତେ ଜୀଦାନବୁ ବିତାଅ ତାନା । ୭ ଆବୁଆଃ ଜୀଦାନ ନେନେଲ୍‌ତେଦ୍ କା ମେନ୍‌ଦ୍ ବିଶ୍ଵାସ୍ ତେତାନରେ ତିଙ୍ଗୁଆକାନା । ୮ ଏନାମେନ୍ତେ ଆବୁ ଜୀଉରେ କେଟେଦ୍‌କେଦ୍‌ତେ, ଆତଃ ନେ ହଡ଼୍‌ମକେ ବାଗିକେଦ୍‌ତେ ପ୍ରାଭୁଲଃ ତାଇନଃ ନାଗେନ୍ତେ ଆବୁ ପୁରାଃଗିବୁ ସାନାଙ୍ଗତାନା । ୯ ଏନାମେନ୍ତେ ଆବୁ ଆପ୍‌ନାଃ ଅଡ଼ାଃରେ ତାଇନଃ ଚାଏ ଏଟାଃ ଅଡ଼ାଃରେ ତାଇନଃ, ପାର୍ମେଶ୍ଵାର୍‌କେ ସୁକୁଇଚିତେୟାଃଗି ଆବୁଆଃ ପୁରାଃ ସାନାଙ୍ଗତାନା । ୧୦ ✧ ଚିୟାଃଚି ଆବୁ ସବେନ୍‌କକେ ଆୟାଃ ହରାତେ ବିଚାର୍ ହବାଅଃ ନାଗେନ୍ତେ ସାର୍‌ତିଗି ଶ୍ରୀଷ୍ଟାଃ ବିଚାର୍ ଠାୟାଦ୍‌ରେ ତିଙ୍ଗୁନ୍ ଲାଗାତିୟାଃ । ଇମ୍‌ତା ବୁଗିନାଃ ହବାଅ ଚାଏ ଏଡ଼କାନାଃ ହବାଅଃ, ଆବୁ ସବେନ୍ ମିମିଆଦ୍ ହଡ଼କ ସାଂସାର୍‌ରେୟାଃ ହଡ଼୍‌ମରେ କାମିକାଦ୍ ଲେକାଗି ନାଲାବୁ ନାମେୟା ।

ଶ୍ରୀଷ୍ଟାଃ ଦେଙ୍ଗାତେ ପାର୍ମେଶ୍ଵାର୍‌ଲଃ ଗାତି

୧୧ ପ୍ରାଭୁକେ ବର ରେୟାଃ ମୁଣ୍ଡି ଚିନାଃ ତାନାଃ, ଏନା ଆଲେ ସାରି କାଦାଲେ ଆତଃ ଏନା ରିକା ନାଗେନ୍ତେ ଆଲେ ସବେନ୍‌କକେ ଆବୁପେତାନାଲେ । ପାର୍ମେଶ୍ଵାର୍ ଆବୁ ସବେନ୍‌କକେ ବୁଗିଲେକାଏ ସାରିୟା । ଆଇଙ୍ଗ୍ ଆସ୍ତା ତାନାଇଙ୍ଗ୍, ଆପେ ଆଇଙ୍ଗ୍‌କେ ବୁଗି ଲେକାପେ ସାରିୟା । ୧୨ ଆଲେ ଆତଃଃମିସା ଆପେୟାଃ ଆୟାର୍‌ରେ ଆଲେଗି ମାଇନ୍ ନାମେ ନାଗେନ୍ତେ କାଲେ ସାନାଙ୍ଗତାନା, ମେନ୍‌ଦ୍ ଅକନ୍‌କ ମନ୍ ଭିତାର୍‌ରେୟାଃ ଚାଇଲ୍ ଚାଲାନ୍ କା ନେଲ୍‌କେଦ୍‌ତେ ହଡ଼କଆଃ ବାହାରି ରେୟାଃ ନେପେଲ୍ ନେଲ୍‌କେଦ୍‌ତେ ଆପାନ୍‌କେ ମାରାଙ୍ଗ୍ ମେନ୍ତେକ କାଜିନ୍‌ତାନା, ଇନ୍‌କୁକେ ଆପେ କାଜିରୁହାଡ଼୍,

✧ ୫:୧୦ ୫:୧୦ ରୋମି ୧୪:୧୦.

ଦାଡ଼ିୟାପେ । ଏନାମେନ୍ତେ ଆଲେୟାଃ ବିଷାଏରେ ଆପେ ଆପାନ୍‌କେ ମାରାଙ୍ଗ୍‌ୟେନ୍ ଉଡ଼ୁଗ ନାଗେନ୍ତେ ଆପେକେ ନେତାଲେ ଏମାପେତାନା । ୧୩ ଚିୟାଃ ଆଲେୟାଃ ମନ୍ ବାଲୁଅଃତାନା ? ତାବ୍‌ଦ ପାର୍‌ମେଶ୍ଵାର୍ ନାଙ୍ଗ୍ ବାଲୁଅଃତାନା । ଚାଏ ଆଲେୟାଃ ମନ୍ ଆବର୍‌ରେ ମେନାଃରେଦ୍, ଏନା ଆପେୟାଃ ନାଗେନ୍ତେ ଆବର୍‌ରେ ମେନାଃ । ୧୪ ଖ୍ରୀଷ୍ଟୁଆଃ ଦୁଲ୍‌ତତେ ଆରୁ ରାଇଜଃ ତାନାବୁ । ଏନାତେ ଆରୁ ନେଆଁ ଉହାଟ୍‌ତାନାବୁ ଯେ, ମିହୁଡ୍ ହଡ୍ ସବେନ୍ ହଡ୍‌କଆଃ ନାଗେନ୍ତେ ଗଜାକାନା, ଏନାତେ ସବେନ୍‌କ ଏନ୍ ଗନଏଃରେୟାଃ ହିସାବୁ ହବାକାନା । ୧୫ ଇନିଃ ସବେନ୍‌କ ନାଗେନ୍ତେ ଗଜାକାନ୍ ହରାତେ ଅକନ୍‌କ ଜାନିଦ୍ ମେନାକଆ, ଇନ୍‌କୁ ଆତଃ ଆପ୍‌ନାଃ ଆପ୍‌ନାଃ ନାଗେନ୍ତେ କା ଜୀହୁଦ୍‌କେଦ୍‌ତେ, ଅକଏତି ଆକଆଃ ନାଗେନ୍ତେ ଗଏଃୟାନା ଆତଃ ଜୀଉବିରିଦ୍‌ୟାନା, ଇନିୟାଃ ନାଗେନ୍ତେକ ଜୀହୁଦଃଆ ।

୧୬ ଏନା ନାଗେନ୍ତେ ଆଲେ ହଡ଼୍‌ମ ଲେକାତେ ବିଚାର୍, ଜେତାଏକେ କାଲେ ବିଚାର୍ ତାନା । ନେତା ତାଇକେନା ଆଲେ ଖ୍ରୀଷ୍ଟୁକେ ହଗି ହଡ଼କେ ବିଚାର୍ ତାନ୍ ଲେକାଲେ ବିଚାରି ତାଇକେନା । ମେନ୍‌ଦ ନାହାଁଃ ଆଲେ ଏନ୍‌ଲେକା କାଲେ ରିକାତାନା । ୧୭ ଜେତାଏ ହଡ଼ ଖ୍ରୀଷ୍ଟୁଲଃ ମେସାକାନ୍‌ରେ, ନାଝା ହଡ଼ ହବାଅଃଆଏ । ମାରିତେୟାଃ ଜିୟନ୍‌କେଦ୍‌ତେ ସବେନ୍ ନାଝା ବିଷାଏ ହବାଅଃଆଃ । ୧୮ ଏନା ସବେନାଃ ପାର୍‌ମେଶ୍ଵାର୍‌ଆଃ କାମିତାନା । ସିଦା ଆରୁ ଇନିୟାଃ ବାଇରିବୁ ତାଇକେନା, ନାହାଁଃ ଇନିଃ ଖ୍ରୀଷ୍ଟୁ ହରାତେ ଆରୁକେ ଆୟାଃଲଃ ମେସାରୁହାଡ୍ କାଦ୍‌ରୁଆ ଆତଃ ଆୟାଃଲଃ ଏଟାଃକକେ ମେସାରୁହାଡ୍ ନାଗେନ୍ତେ ଇନିଃ ଆରୁକେ ବାହାରମ୍ ଏମାକାଦ୍‌ରୁଆଏ । ୧୯ ଏନାତେ ଆରୁଆଃ କାନାଜି ହବାଅଃତାନା, ପାର୍‌ମେଶ୍ଵାର୍, ଖ୍ରୀଷ୍ଟୁଆଃ ହରାତେ ଅତେଦିଶ୍ଵମ୍‌ରେନ୍ ସବେନ୍ ହଡ଼କକେ ଆୟାଃଲଃ ମେସାରୁହାଡ୍ ନାଗେନ୍ତେ ହରା ବାଇୟାକାଦାଏ । ଆୟାଃ ବିରୁଧ୍‌ରେୟାଃ ସବେନ୍ ପାପ୍‌କ ଇନିଃ ଆୟାଃ ଗିନ୍‌ଡିରେ କାଏ ଦହକାଦା । ଆତଃ ଏନ୍ ମେସାରୁହାଡ୍ ରେୟାଃ ସୁକୁକାଜି ଉଦ୍‌ବ୍ ନାଗେନ୍ତେ ଆରୁକେ ବାହାରମ୍ ଏମାକାଦ୍‌ରୁଆଏ ।

୨୦ ଏନାତେ, ଆରୁ ଖ୍ରୀଷ୍ଟୁସାଃଏତେ ନେଆଁ କାଜିତାନାବୁ, ପାର୍‌ମେଶ୍ଵାର୍ ଆଇଃକଗି ଆରୁଆଃ ହରାତେ ନେ କେନେଡ଼ା

ଏମାକାଦାଏ ମେନ୍ତେ ଆବ୍‌କାର୍ ଲାଗାଡ଼ିଙ୍ଗିୟାଁ । ଶ୍ରୀଷ୍ଟସାଃତେ
ଆଲେ ବିକ୍ତିପେ ତାନାଲେ, ପାର୍‌ମେଶ୍ଵାର୍‌ଲଃ ମେସାରୁହାଡ଼େନ୍‌ପେ,
୨୧ ଚିୟାଃତି ଶ୍ରୀଷ୍ଟ, ବେଗାର୍ ପାପତେ ତାଇକେନ୍‌ରେୟ୍,
ପାର୍‌ମେଶ୍ଵାର୍ ଇନିଃକେ ଆବୁଆଃ ପାପ୍‌ରେୟାଃ ହିସାଏ ବାଇକିୟା,
ଜେ'ଲେକାତି ଆବୁ ଆୟାଃଲଃ ମେସାକେଦ୍‌ତେ ପାର୍‌ମେଶ୍ଵାର୍‌ଆଃ
ଧାର୍‌ମାନ୍‌ରେୟାଃ ହିସାବୁ ହବା ଦାଡ଼ିୟାଆ ।



୧ ପାର୍‌ମେଶ୍ଵାର୍‌ଆଃ ନାଗେନ୍ତେ ମିସାତେ କାମିତାନ୍ ହରାତେ
ଆଲେ ଆପେକେ ବିକ୍ତିପେତାନାଲେ, ଆପେୟାଃ ଜୀଦାନ୍‌ରେ
ପାର୍‌ମେଶ୍ଵାର୍‌ଆଃ ସାୟାଦ୍‌କେ ଆଲ୍‌ପେ ସାମାଏଶ୍ଵାଃଏୟା ।
୨ ଚିୟାଃତି ଇନିଃ କାଜିୟାଃଏ, “ଆପେୟାଃ ନାଗେନ୍ତେ ଦାୟା
ଉଦୁବ୍ ନାଙ୍ଗ୍ ଦିପିଲି ହିଦୁଃୟାନ୍ ଇମ୍‌ତା ଆଇଙ୍ଗ୍ ଆପେୟାଃ
ବିକ୍ତିଇଙ୍ଗ୍ ଆୟୁମ୍‌କେଦା, ଜୀଉବାଞ୍ଚାଅ ହୁଲାଙ୍ଗ୍‌ରେ ଆଇଙ୍ଗ୍
ଆପେକେଇଙ୍ଗ୍ ଦେଙ୍ଗାକେଦ୍‌ପେୟା ।” ନେଲେପେ ! ନେଆଁ
ହବାଅଃତାନା, ପାର୍‌ମେଶ୍ଵାର୍‌ଆଃ ଦାୟା ତେଲାରେୟାଃ ନେଡା ।
ତିସିଙ୍ଗ୍ ହବାଅଃତାନା ଜୀଉବାଞ୍ଚାଅଃରେୟାଃ ଦିପିଲି ।

୩ ଅକନ୍ ସେଞ୍ଜାକାମି ଆବୁ ନାମାକାଦାରୁ, ଏନାକେ ଜେତାଏ
ଆଲକାକ ଚିଟାଏ, ମେନ୍ତେ ଆଲେ ଜେତାଏୟାଃ କାମିରେ
କାଜିକଟଙ୍ଗ୍ ହବାଅଃ ନାଗେନ୍ତେ କାଲେ ସାନାଙ୍ଗ୍‌ତାନା ।
୪ ମେନ୍‌ଦ ସବେନ୍ ଲେକାନ୍ ନେଡାରେ ଆଲେ ଆପାନ୍‌କେ
ପାର୍‌ମେଶ୍ଵାର୍‌ଆଃ ଦାସି ଲେକାଲେ ଉଦୁବେନ୍‌ତାନା, ଆଲେ
ସବେନ୍ ଲେକାନ୍ ଦୁକୁ, ହାସୁ, ସାଙ୍କାର୍‌ରେ ପୁରାଃ ଧିରାଜ୍‌ରେ
ସାହାଡ଼ିଙ୍ଗ୍ କାଦାଲେ ।* ଆଲେ ଦାଲ୍‌ୟାନ୍‌ରେ, ଜେହେଲ୍‌ୟାନ୍‌ରେ,
ହାଲାଗୁଲାଅଃତାନ୍‌ରେ, କେଟେଦ୍ କାମିରେ, ବେଗାର୍ ଦୁଡ଼ମୁତେ,
କାଟାବ୍‌ତେ, ୬ ଫାର୍‌ଚିନ୍‌ରେ, ସେଣ୍‌ନ୍‌ରେ, ଧିରାଜ୍‌ତେ, ଦାୟାତେ,
ଆଲେୟାଃ ସାର୍‌ତି ଦୁଲାଡ଼୍‌ତେ, ପାବିତାର୍ ଆମ୍‌ତେ, ୭ ଆଲେୟାଃ
ସାର୍‌ତି ସୁକୁକାଜିତେ, ଆତଃ ପାର୍‌ମେଶ୍ଵାର୍‌ଆଃ ପେଡ଼େଃତେ ଆଲେ
ଆପାନ୍‌କେ ପାର୍‌ମେଶ୍ଵାର୍‌ଆଃ ଦାସି ମେନ୍ତେଲେ ଉଦୁବେନ୍‌ତାନା ।
ବାଇରିକଆଃ ବିରୁଧ୍‌ରେ ଲାଡ଼ାଇ ନାଗେନ୍ତେ ଧାର୍‌ମାନ୍ ହବାଅଃତାନା

☆ ୬:୫ ୬:୫ ପ୍ରେରିତ୍ ୧୭:୨୩.

ଆଲେୟାଃ ହାଁତେୟାର୍ । ୮ ଆଲେ ମାଇନ୍ ନାମେ ଚାଏ ମାଇନ୍ କା ନାମେ, ଲାନ୍ଦାଅଃତାନ୍ ଚାଏ ସାହାରାଅ ନାମେତାନ୍, ଆଲେକେ ହସତ୍ତ୍ ଫେନ୍ତେ କାଜିଲେ ତାନାକ, ଏନ୍ରେୟ ଆଲେ ସାର୍ତି କାଜିତାନାଲେ । ୯ ଆଲେ ସବେନ୍କଲଃ ନେଲ୍ଡରୁମ୍ କାନ୍ରେୟ, କାଲେ ନେଲ୍ଡରୁମ୍କାନ୍ ଲେକା ମେନାଲେୟା, ଜାନିଦ୍ ମେନାଲେରେୟ, ଗଜାକାନ୍କ ଲେକା ମେନାଲେୟା । ଆଲେ ସାଜାଇ ନାମେତାନାଲେ, ମେନ୍ଦ କାଲେ ଜିୟନାକାନା । ୧୦ ଆଲେ ହୁଡିଙ୍ଗ୍‌ଜୀଉକାନ୍ରେୟ ସବେନ୍ ଇମ୍ତା ରାସ୍‌କାଗି ମେନାଲେୟା । ଆଲେ ନାରାଦୁରାଗିଲେ ନେଲଃତାନା, ମେନ୍ଦ ପୁରାଃ ହତ୍ତକକେଲେ କିସାଣ୍ଡକାଦକଆ । ଆଲେୟାଃ ଜେଡ୍‌ନାଃ ବାନଃଲେକା ଆଟ୍‌କାରଃ ତାନା, ମେନ୍ଦ ସାର୍ତିଗି ଆଲେ ସବେନାଃଲେ ଆକ୍‌ତେୟାର୍‌କାଦା ।

୧୧ କବିଚ୍ଛିରେନ୍ ଦୁଲାଡ୍ ଗାତିକ, ଆଲେ ବେଗାର୍ ବେଦାତେ ସବେନାଃଲେ କାଜିକାଦ୍‌ପେୟା, ଆଲେ ଆପେକେ ପୁରାଃଗିଲେ ଦୁଲାଡ୍‌ପେ ତାନା । ୧୨ ଆପେ ନାଗେନ୍ତେ ଆଲେୟାଃ ଦୁଲାଡ୍ କା ଲାସ୍‌ରକାନା, ମେନ୍ଦ ଆପେୟାଃ ଦୁଲାଡ୍ ଲାସ୍‌ରକାନା । ୧୩ ଆଇଁୟାଃ ହନ୍‌କକେ କାଜିକତାନ୍ ଲେକା ଆଇଙ୍ଗ୍ ଆପେକେଇଙ୍ଗ୍ କାଜିପେତାନା, ଆଲେ ଆପେକେ ଦୁଲାଡ୍‌ପେ ତାଇକେନ୍ ଲେକାଗି, ଆପେୟ ଆଲେକେ ଦୁଲାଡ୍‌ଲେପେ ।

ସାଅଁସାର୍ ହତ୍ତକଲଃ ଆଲ୍‌ପେ ଜକାନାଃ

୧୪ ଅକନ୍‌କ ଶ୍ରୀଷ୍ଟକେ କାକ ବିଶ୍ୱାସ୍‌ତାନା, ଇନ୍‌କୁଲଃ ମିଦ୍‌ଜକାତେ କାମି ନାଗେନ୍ତେ ଆଲ୍‌ପେ ସାନାଙ୍ଗ୍‌ଆଃ । ନେ'ଲେକା ତିଉଲାଅ କା ହବାଦାଡ୍‌ୟାଆ, ଚିୟାଃତି ଧାର୍‌ମାନ୍ ଆତଃ କା ଧାର୍‌ମାନ୍‌କଲଃ ଚିକାନ୍ ସାଙ୍ଗାତି ? ମାର୍‌ସାଲ୍ ଆତଃ ନୁବାର୍ ତିଲ୍‌କାତେ ମିଦ୍‌ରେ ତାଇନା ? ୧୫ ଶ୍ରୀଷ୍ଟ ଆତଃ ସାଏତାନ୍ ତିଲ୍‌କାତେ ମିଦେନାକିନ୍ ? କା ବିଶ୍ୱାସ୍ ତାନିଃଲଃ ବିଶ୍ୱାସ୍‌ତାନିଃ ଚିକାନ୍ ବିଷାଏରେ ମେସା ଦାଡ୍‌ନାଃ ? ୧୬ ✨ସାଅଁସାର୍‌କଆଃ ମୁରୁଡ୍‌କଲଃ ପାର୍‌ମେଶ୍ୱାର୍‌ଆଃ ମାନ୍‌ିର୍ ତିଲ୍‌କାତେ ମେସାଅଃଆ ? ଆରୁଦ୍ ଜାନିଦ୍ ପାର୍‌ମେଶ୍ୱାର୍‌ଆଃ ମାନ୍‌ିର୍ ତାନ୍‌ବୁ, ଚିୟାଃତି ପାର୍‌ମେଶ୍ୱାର୍ ଆଇଃକ୍‌ଗି କାଜିକାଦା, “ଆଇଙ୍ଗ୍ ଆଇଁୟାଃ ହତ୍ତକଲଃ ତାଇନାଇଙ୍ଗ୍

✨ ୬:୧୭ ୬:୧୭ ୧ କବିଚ୍ଛିନ୍ଦ ୩:୧୭; ୬:୧୯.

ଆତଃ ଇନ୍‌କୁଆଃ ଆଲାରିଙ୍ଗ୍ ହନର୍ ବାଡ଼ାଏୟା ଆତଃ ଆଇଙ୍ଗ୍ ଇନ୍‌କୁଆଃ ପାର୍‌ମେଶ୍ୱାର୍ ହବାଅଃଆଇଙ୍ଗ୍ ଆତଃ ଇନ୍‌କୁ ଆଇଁୟାଃ ଆପ୍‌ନାଃ ହଡ଼କ ହବାଅଃଆକ ।”^{୧୭} ଏନାତେ ପ୍ରାଭୁ କାଜିୟାଃଏ, “ଇନ୍‌କୁକେ ବାଗିତାକପେ ଆତଃ ଇନ୍‌କୁତାଃଏତେ ଆତମେନ୍‌ପେ । ସତ୍‌ରା ବିଷାଏଲଃ ନାତା ଆଲ୍‌ପେ ଦହଏଆ, ଏନାରେ ଆଇଙ୍ଗ୍ ଆପେକେଇଙ୍ଗ୍ ଦାରମ୍‌ପେୟା ।^{୧୮} ଆଇଙ୍ଗ୍ ଆପେୟାଃ ଆପୁ ଆତଃ ଆପେ ଆଇଁୟାଃ କଡ଼ାହନ୍‌କ ଆତଃ କୁଡ଼ିହନ୍‌କ ହବାଅଃଆପେ, ପେଡ଼େୟାନ୍ ପ୍ରାଭୁ ନେଆଁଏ କାଜିତାନା ।”



^{୧୯} ହେ ଦୁଲ୍‌ାଡ଼୍ ହାଗା ମିଶିକ, ନେ ସବେନ୍ ବାନାର୍‌ସା ଆବୁ ପାର୍‌ମେଶ୍ୱାର୍‌ତାଃଏତେ ନାମାକାଦାରୁ । ଏନାତେ ଏଲା ହିଜୁଃପେ, ହଡ଼ମ୍‌ଆତଃଆମ୍‌ାକେ ସତ୍‌ରାଏତାନ୍ ସବେନ୍ ବିଷାଏତେ ଆପାନ୍‌କେ ଫାର୍‌ତିନ୍‌ପେ । ଆତଃ ପାର୍‌ମେଶ୍ୱାର୍‌କେ ବରଭାକ୍ତିତାନ୍‌ଲଃ ପୁରାଗି ପାବିତାର୍‌କେଦ୍‌ତେ ତାଇନାରୁ ।

ପାଉଲୁସ୍‌ଆଃ ରାସ୍‌କା

^୨ ଆପେୟାଃ ମନ୍‌ସୁରୁଦ୍‌ରେ ଆଲେକେ ଠାୟାଦ୍ ଏମାଲେପେ । ଆଲେ ଜେତାଏୟାଃ ଏଡ଼କାନ୍ କାଲେ ରିକା, ଜେତାଏୟାଃ କାଲେ ହାନିକାଦା, ଜେତାଏତାଃଏତେ ଜେଡ଼ନାଃ ନାମେ ନାଗେନ୍ତେ ବେଦାକେଦ୍‌ତେ କାଲେ ଆଉକାଦା ।^୩ ଆପେକେ ଚିଟାପେ ନାଗେନ୍ତେ ଆଇଙ୍ଗ୍ ନେ କାଜି କାଇଙ୍ଗ୍ କାଜିତାନା । ଆଇଙ୍ଗ୍ ସିଦାରେଇଙ୍ଗ୍ କାଜିକାଦା, ଆପେ ଆଲେୟାଃ ନିମିନାଙ୍ଗ୍ ଦୁଲ୍‌ାଡ଼୍‌କ ତାନ୍‌ପେ ଯେ, ଆବୁ ଜାନିଦ୍ ତାଇନଃ ଚାଏ ଗଜଃ, ଆବୁ ସବେନ୍ ଇମ୍‌ତା ମିଦ୍‌ତାଃରେ ମେନାରୁଆ ।^୪ ଆପେତାଃରେ ଆଇଁୟାଃ ପୁରାଃ ବିଶ୍ୱାସ୍‌ମେନା । ଆପେୟାଃ ନାଗେନ୍ତେ ଆଇଙ୍ଗ୍ ଆପାନ୍‌କେ ମାରାଙ୍ଗ୍‌ୟେନ୍‌ତେୟାଃ ହଗି ପୁରାଃଗିଆ । ଦୁକୁହାସ୍‌ରେ ଆଇଙ୍ଗ୍ ପୁରାଃଗି ଜାଉରାଡ଼େଃ ନାମ୍‌କେଦ୍‌ତେ ରାସ୍‌କାତେଇଙ୍ଗ୍ ପେରେଜାକାନା ।

^୫ *ମାକିଦନିଆତେ ସେଟେରକେଦ୍‌ତେହିଁ ଆଲେୟାଃ ହଡ଼ମ୍‌କା ରୁଡ଼୍‌ୟାନା । ହଡ଼କଲଃ ସବେନ୍‌ତାଃରେ କା ବାପାଲ ଆତଃ ଏପେଗେର୍ ହବାଅଃ ତାଇକେନା, ଏନାତେ ଆଲେୟାଃ

☆ ୭:୫ ୭:୫ ୨ କରିଷ୍ଣିୟ ୬:୧୩.

ମନ୍ସୁରୁଦ୍ରେ ବର ତାଇକେନା ।^୬ ମେନ୍ଦ ହୁଡ଼ିଙ୍ଗଜୀଉକାନ୍‌କକେ ଜୀଉରାଡ଼େଃ ଏମାକତାନ୍ ପାର୍ମେଶ୍ୱାର୍ ତିତସକେ ଆଲେତାଃତେ କୁଲ୍‌କେଦ୍‌ତେ ଜୀଉରାଡ଼େଃ ଏମାକାଦ୍‌ଲେୟାଏ ।^୭ ଇନିୟାଃ ହିନିକ୍‌ୱିଃ ହରାତେ ଏସ୍‌କାର କାହା, ମେନ୍ଦ ଇନିଃ ଆପେତାଃତେ ସେନ୍‌କେଦ୍‌ତେ ଅକନ୍ ଜୀଉରାଡ଼େଃ ନାମାକାଦାଃଏ, ଏନା ହରାତେ ଆଲେ ରାସ୍‌କାଅଃ ତାନାଲେ । ଆଇଙ୍ଗକେ ନେନେଲ୍ ନାଗେନ୍ତେ ଆପେୟାଃ ଚିମିନ୍ ଇଛାସାନାଙ୍ଗ୍, ଆଇଁୟାଃ ନାଗେନ୍ତେ ଆପେୟାଃ ଚିମିନ୍ ଦୁକୁ, ଆଇଁୟାଃସାଃରେ ଜେଡ୍‌ନାଃ କାଜି ନାଗେନ୍ତେ ଆପେ ଚିମିନ୍ ଚିହ୍ଲୁଲ୍‌ଲାନି ମେନାପେୟା, ନେ ସବେନ୍ ବିଷାଏ ଇନିଃ ଆଇଙ୍ଗକେ ଉଦୁଦ୍‌କାଦିୟାଃ । ଏନାତେ ଆଇଙ୍ଗ ପୁରାଃଗିଇଙ୍ଗ ରାସ୍‌କା କାନା ।

୮ ଆଇଁୟାଃ ଚିଠି ପାଢ଼ାଅକେଦ୍‌ତେ ଆପେ ହୁଡ଼ିଙ୍ଗଜୀଉକାନ୍‌ରେୟ, ଏନ୍ ଚିଠି ଅଲାଇଦ୍ ହରାତେ ଆଇଁୟାଃ ମନ୍ରେ ଜେତାନ୍ ଦୁକୁ ବାନଃଆ । ନେ ଚିଠି ଆପେକେ ଘାଡ଼ିକାଦ୍ ନାଙ୍ଗ୍ ହୁଡ଼ିଙ୍ଗଜୀଉକାଦ୍‌ପେ ନାଗେନ୍ତେ ଆଇଙ୍ଗ ଦୁକୁକାନ୍‌ତେୟାଃଇଙ୍ଗ ।^୯ ମେନ୍ଦ ଆପେୟାଃ ମନ୍ରେ ଦୁକୁ ଏମାକାଦ୍‌ପେ ହରାତେ କାହାଗି, ମେନ୍ଦ ନେ ଦୁକୁ ଆପେୟାଃ ଜୀଦାନ୍‌ରେୟାଃ ସେନ୍‌ହରା ବାଦ୍‌ଲାଅକାଦ୍ ହରାତେ ନାହାଃ ଆଇଙ୍ଗ ରାସ୍‌କାଅଃ ତାନାଇଙ୍ଗ । ପାର୍ମେଶ୍ୱାର୍‌ଆଃ ମନେ ଲେକାତେ ଆପେ ନେ ଦୁକୁ ସାହାତିଙ୍ଗକାଦାପେ । ଏନାତେ ଆଲେୟାଃ ହରାତେ ଆପେ ଜେତାଲେକାତେ କାପେ ହାନିକାନା ।^{୧୦} ଚିୟାଃଚି ନେ ଲେକାନ୍ ଦୁକୁ ପାର୍ମେଶ୍ୱାର୍‌ଆଃ ହରାତେ ବେଭାରକେଦ୍‌ତେ ମନ୍ସୁରୁଦ୍ ନେ'ଲେକା ବାଦ୍‌ଲାଅଃରେଦ୍ ଜୀଉବାଞ୍ଚାଅ ନାମଃଆ । ନେଆଁରେ ହୁଡ଼ିଙ୍ଗଜୀଉଃରେୟାଃ ଜେଡ୍‌ନାଃ ବାନଃଆ । ମେନ୍ଦ ସାଂସାରରେୟାଃ ଦୁକୁରେ ଏସ୍‌କାର ଗନଏଃ ହବାଅଃଆ ।^{୧୧} ନେଲେପେ, ପାର୍ମେଶ୍ୱାର୍‌ଆଃ ଇଛାସାନାଙ୍ଗ୍ ଲେକାତେ ଆପେ ଅକନ୍ ଦୁକୁପେ ନାମାକାଦା, ଏନା ଆପେତାଃରେ ଚିମିନ୍ ରାସ୍‌କା, ଚିମିନ୍ ବର, ଚିମିନ୍ ଚିହ୍ଲୁଟ୍, ଆମ୍ବା ସୁଧରାଅ ନାଙ୍ଗ୍ ଚିମିନ୍ ଉନ୍‌ଦୁଦ୍, ଏଡ୍‌କାନ୍ ହଡ୍‌କକେ ସାଜାଇ ଏମ୍ ନାଙ୍ଗ୍ ଚିମିନ୍ ଚିହ୍ଲୁଲ୍‌ଲାନି କାଜିକ ହବାକାନା । ନେ ସବେନ୍ ବିଷାଏରେ ଆପେ ବେଗାର୍ ଚିଟାକାନ୍ ଲେକାପେ ଉଦୁବାକାନା ।

^{୧୨} ଆପେକଏତେ ଜେତାଏ ଏଡ୍‌କାନ୍ କାମିକାଦାଏ ଚାଏ ଏଡ୍‌କାନ୍

ସାହାତିକାଦାଏ, ଇନିୟାଃ ନାଗେନ୍ତେ ଆଇଙ୍ଗ ଏନ୍ ଚିଠି କାଇଙ୍ଗ ଅଲାଇକାଦା । ମେନ୍ଦ ପାର୍ମେଶ୍ଵାର୍ଆଃ ନେପେଲ୍ରେ ଆଲେ ନାଙ୍ଗ ଆପେୟାଃ ଭାଲ୍ଲି ଚିମିନ୍ ଇକିରା ଆତଃ ^{୧୩}ଏନା ନାଙ୍ଗ ଆଲେ ଚିମିନ୍ ଜୀଉରାଡ଼େଃ ନାମାକାଦାଲେ । ଏନା ଉଦୁବ୍ ନାଗେନ୍ତେ ଆଇଙ୍ଗ ଏନ୍ ଚିଟାଉ ଅଲାଇକାଦାଇଙ୍ଗ । ଆଲେ ଜୀଉରାଡ଼େଃ ଏସ୍କାର୍ କାଲେ ନାମାକାଦା, ମେନ୍ଦ ଆପେ ତିତସ୍କେ ସବେନ୍ ଲେକାତେ ଦେଙ୍ଗାତାନ୍ଲଃ ଚିଲ୍କା ରାସ୍କା କାଇଜାପେ, ଏନା ଆଲେକେ ପୁରାଃଗି ରାସ୍କାଲେତାନା । ^{୧୪}ଆୟାଃ ଆୟାର୍ରେ ଆପେ ନାଗେନ୍ତେ ଆଇଙ୍ଗ ଆପାନକେ ମାରାଙ୍ଗ୍ ମେନ୍ତେଇଙ୍ଗ୍ କାଜିତାନା । ଆତଃ ଆପେ ଆଇଙ୍ଗକେ କାପେ ହୁଡ଼ିଙ୍ଗ୍ଜୀଉକାଦିୟା । ଆଲେ ସବେନ୍ ଇମ୍ତା ଆପେତାଃରେ ସାର୍ତ୍ତିଗିଲେ କାଜିକାଦା, ଏନ୍ଲେକାଗି ତିତସ୍ଆଃ ସାମ୍ନାଙ୍ଗ୍ରେ ଆଲେ ଆପାନକେ ମାରାଙ୍ଗ୍ ମେନ୍ତେ କାଜିନ୍ତେୟାଃ ସାର୍ତ୍ତି ତାନାଃ । ^{୧୫}ଚିଲ୍କା ଆପେ ସବେନ୍କ ଇନିୟାଃ କାଜିକ ମାନାତିଙ୍ଗ୍ ନାଙ୍ଗ୍ ସେକାଡ଼କାନ୍ ତାଇକେନାପେ ଆତଃ ବରତାନ୍, ଏକ୍ଲାଅଃତାନ୍ଲଃ ଇନିଃକେ ଦାରମ୍କିୟାପେ, ନେ କାଜିକ ପାହାମ୍କେଦ୍ତେ ଆପେ ନାଗେନ୍ତେ ଆୟାଃ ଦୁଲାଡ଼୍ ଆତଃଗି ହାରାଇଦିୟାତାନା । ^{୧୬}ଆତଃ ଆଇଙ୍ଗ୍ ସବେନ୍ ବିଷାଏରେ ଆପେତାଃରେ ପୁରାଃଗିଙ୍ଗ୍ ବିଶ୍ଵାସ୍ ଦାଡ଼ିୟା, ଏନାମେନ୍ତେଇଙ୍ଗ୍ ରାସ୍କାଅଃତାନା ।

୮

ଖ୍ରୀଷ୍ଟିୟାନକଆଃ ଏମଃ

^୧ ☆ହେ ହାଗା ମିଶିକ, ମାକିଦନିଆରେୟାଃ କାଲିସିୟାକରେ ଚିଲ୍କା ପାର୍ମେଶ୍ଵାର୍ଆଃ ସାୟାଦ୍ ନାମାକାଦାକ, ଏନା ଆପେକେ ଉଦୁବ୍ ନାଗେନ୍ତେ ସାନାଙ୍ଗ୍ତାନାଲେ । ^୨ଇନ୍କୁ ପୁରାଃ ଦୁକୁଡେ ପୁରାଃଗିକ ବିଡ଼ାଅୟାନା । ଇନ୍କୁ ପୁରାଃଗି ନାରାଦୁରାକ ତାଇକେନ୍ରେୟ, ଆକଆଃ ଏମଃରେ, ଚିମିୟାଙ୍ଗ୍ ଏମ୍ରେୟାଃ କାଜି ଏନାଏତେ ଆଦ୍କା ସୁକୁମନ୍ତେକ ଏମ୍କେଦା । ^୩ଆଇଙ୍ଗ୍ ସାର୍ତ୍ତିଗି ଗାଞ୍ଜା ଏମ୍ତାନାଇଙ୍ଗ୍, ଇନ୍କୁ ଆକଆଃ ଇଛାସାନାଙ୍ଗ୍ ଲେକାତେ ଚିମିନାଙ୍ଗ୍ ଏମ୍ ଦାଡ଼ିରେୟାଃ ପେଡ଼େଃ ମେନାଃ

☆ ୮:୧ ୮:୧ ରୋମି ୧୫:୨୭.

ଇମ୍ମାନୁଏଲ୍ ଏମ୍ବେଦାକ ଆଡ଼ଃ ଏନାଏତେ ଆଦ୍‌କାହିଁ ଏମ୍ବେଦାକ । ୪ ଯିହୁଦାରେ ତାଇନ୍‌ତାନ୍ ପାର୍ମେଶ୍ୱାର୍‌ଆଃ ହଡ଼କକେ ଦେଙ୍ଗାକ ନାଗେନ୍ତେ ଇନ୍‌କୁକେ ସୁଯୋଗ୍ ନାମଃକା ମେନ୍ତେ ଇନ୍‌କୁ ଆଲେକେ ବିକ୍ରିକାଦ୍‌ଲେ ତାଇକେନାକ । ୫ ଇନ୍‌କୁତାଃଏତେ ଆଲେ ଇମ୍ମାନୁଏଲ୍ କାଲେ ଆସ୍ରାକାଦ୍ ତାଇକେନା । ସିଦାତେ ଇନ୍‌କୁ ଆପାନ୍ ଆପାନ୍‌କେ ପ୍ରାଭୁତାଃରେକ ଜିମାକାନ୍ ତାଇକେନା ଆଡ଼ଃ ତାୟମ୍‌ତେ ପାର୍ମେଶ୍ୱାର୍‌ଆଃ ଇଛା ଲେକାତେ ଆପାନ୍ ଆପାନ୍‌କେ ଆଲେୟାଃ ନାଗେନ୍ତେକ ଜିମାୟାନା । ୬ ତିତସାଃ ଦେଙ୍ଗାତେ ନେ ସାୟାଦ୍‌ରାଃ କାମି ଏଟେଦ୍‌କାନ୍ ତାଇକେନା । ନେ କାମି କାମିଇଦିୟଃକା ଆଡ଼ଃ ନେ ଦୁଲ୍ଲାଡ଼୍‌ରେୟାଃ ସେଝାକାମିରେ ତିତସ୍ ଆପେକେ ଦେଙ୍ଗାପେକା ମେନ୍ତେ ଆଲେ ତିତସ୍‌କେ ବିକ୍ରିକାଇ ତାଇକେନାଲେ । ୭ ମେନ୍‌ଦ୍ ଆପେ ସବେନ୍ ବିଷାଏରେ କିସାଁକ୍‌ନାପେ, ବିଶ୍ୱାସ୍‌ରେ, ଜାଗାର୍‌ରେ ପକତା, ସେଣ୍ଟାନ୍‌ରେ, ଦେଙ୍ଗାରେ ଚିହ୍ନାକାମାପେ, ଆଡ଼ଃ ଆଲେ ନାଗେନ୍ତେ ଆପେୟାଃ ଦୁଲ୍ଲାଡ଼୍ ପୁରାଃତେ ଉଦୁବ୍‌କାଦାପେ । ଏନ୍ତେ ନେ ସାୟାଦ୍‌ରେୟାଃ ସେଝାକାମିରେୟ ଦାନ୍ ଏମ୍ବେଦ୍‌ତେ ଦୁଲ୍ଲାଡ଼୍‌ରେୟାଃ ପାରିତାଏ ଏମେପେ, ଏନା ଆଇଁୟାଃ ସାନାଙ୍ଗ୍‌ତାନାଃ ।

୮ ଆଇଙ୍ଗ୍ ଆପେକେ ହୁକୁମ୍ ଏମ୍‌ତାନ୍ ଲେକା କାଇଙ୍ଗ୍ କାଜିତାନା, ମେନ୍‌ଦ୍ ସେଝାକାମିରେ ଏଟାଃକଆଃ ଇଛାସାନାଙ୍ଗ୍‌ରେୟାଃ ନାମୁନା ଏମ୍ବେଦ୍‌ତେ ଆପେୟାଃ ଦୁଲ୍ଲାଡ଼୍‌ରେୟାଃ ସାର୍‌ତିତେୟାଃ ଆଟ୍‌କାର୍‌ଉରୁମ୍ ନାଗେନ୍ତେଇଙ୍ଗ୍ ସାନାଙ୍ଗ୍‌ତାନା । ୯ ଆପେ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ସାୟାଦ୍‌କେପେ ସାରିତାନା । ଆପେକେ କିସାଁକ୍ ବାଇପେ ନାଗେନ୍ତେ, ଇନିଃ କିସାଁକ୍ ତାଇକେନ୍‌ରେୟ, ଆପେୟାଃ ନାଗେନ୍ତେ ଆଇଃକ୍‌ଗି ନାରାଦୁରାୟାନା ।

୧୦ ନେ ବିଷାଏରେ ଆଇଁୟାଃ ବିଚାର୍ ହବାଅଃତାନା, ସେନଃୟାନ୍ ସିମା ଆପେ ଅକ୍‌ନାଃ ଏଟେଦ୍‌କାଦ୍ ତାଇକେନାପେ, ଏନା ନାହାଁଃ ଚୁଣ୍ଟୁରିକା ନାଗେନ୍ତେ ଆପେକେ ଲାଗାତିଙ୍ଗ୍‌ୟାଃ । କାମି ରିକାରେ ଏସ୍‌କାର୍ କାହାଗି, ମେନ୍‌ଦ୍ ଏନ୍ କାମି ରିକା ନାଗେନ୍ତେ ସାନାଙ୍ଗ୍‌ତେୟାଃରେ ଆପେ ହବାଅଃତାନାପେ ପାହିଲା । ୧୧ ଏନାତେ କାମି ରିକାକାଦିକାତେପେ ଆଡ଼ଃ ଆପେୟାଃ ନେତାଲେକା ଏନ୍ କାମିକେ ଚାବାଏପେ । ଉହାଟ୍‌ତାନ୍ ତାଇକେନ୍ ଇମ୍‌ତା ଆପେୟାଃ

ଅକନ୍ଦ ଇଚ୍ଛାସାନାଙ୍କ ତାଇକେନା, ଏନ୍ ଲେକାଗି କାମି ଚାବାଏ ଜାକେଦ୍ କାମିକାତେପେ । ୧୨ ଏମ୍ ନାଗେନ୍ତେ ଇଚ୍ଛାସାନାଙ୍କ୍ ମେନାଃରେଦ୍, ଆପେ ଅକ୍ନାଃ ଏମ୍ ନାଗେନ୍ତେ ଦାଡ଼ିୟାପେ, ଏନାକେ ପାର୍ମେଶ୍ଵାର୍ ତେଲ୍ୟାୟାଏ । ଆପେତାଃରେ ମେନାତେୟାଃଏତେ ଆଦ୍ କା ଏମେପେ ମେନ୍ତେ ପାର୍ମେଶ୍ଵାର୍ କାଏ ସାନାଙ୍କ୍ଆଃ ।

୧୩ ଆପେୟାଃ ଚେତାନରେ ବାହାରମ୍ ଲାଦିକେଦ୍ତେ, ଏଟାଃକ ସୁକୁ ନାମେକାକ ମେନ୍ତେ ଆଇଙ୍କ୍ କାଇଙ୍କ୍ ସାନାଙ୍କ୍ତାନା । ୧୪ ମେନ୍ଦ୍ ନାହାଃ ଆପେୟାଃ ପୁରାଃଗି ମେନାଃ ହରାତେ, ଜାଞ୍ଜିଆକାନ୍ ହଡ଼କକେ ଆପେକେ ଦେଙ୍ଗା ଲାଗାଡ଼ିଙ୍କ୍ୟାଃ । ନେତା ସେଟେରା, ଆପେ ଜାଞ୍ଜିଆକାନ୍ ତାଇନଃ ଇମ୍ତା, ଇନ୍ଦ୍କୁତାଃରେ ପୁରାଃଗି ତାଇନଃରେ ଆପେୟାଃ ଲାଗାଡ଼ିଙ୍କ୍ତେୟାଃ ପୁରାଏ ନାଗେନ୍ତେକ ଦେଙ୍ଗାପେୟା । ନେ ଲେକାତେ ଆପେ, ଆପେୟାଃ ଆଲାରେ ମିଦ୍ଜକାଗି ଦେଙ୍ଗା ହବାଅଃଆ । ୧୫ ଧାରାମ୍ପୁଅରେ ଅଲ୍ଲାନା, “ଜେତାଏ ପୁରାଃଗି ହୁଣ୍ଡିକେଦା, ଇନିୟାଃ କା ବାଚାଅୟାନା, ଆତଃ ଜେତାଏ କାଟିଃଗି ହୁଣ୍ଡିକେଦା, ଇନିୟାଃ କା ଜାଞ୍ଜିୟାନା ।”

ଡିତସ୍ ଆତଃ ଆୟାଃ ଗାଡ଼ିରେ କାମିତାନ୍ଦକ

୧୬ ପାର୍ମେଶ୍ଵାର୍ଆଃ ଧାନ୍ୟାବାଦ୍ ହବାଅଃକା, ଚିୟାଃଗି ଆବୁଆଃ ଲେକା ଡିତସ୍ଆଃ ମନ୍ସୁରୁଦ୍ରେ ହଗି ଆପେକେ ଦେଙ୍ଗା ନାଗେନ୍ତେ ଇଚ୍ଛାସାନାଙ୍କ୍ ହବାକାନା । ୧୭ ଇନିଃ ଆଲେୟାଃ ବିନ୍ତ୍ରିକେ ଏସ୍କାର୍ ଦାରମ୍କେଦାଏ ମେନ୍ତେଦ କାହାଗି, ମେନ୍ଦ୍ ଆପେକେ ଦେଙ୍ଗାପେ ନାଗେନ୍ତେ ନିମିନାଙ୍କ୍ ଇଚ୍ଛାସାନାଙ୍କ୍ କେଦାଏ ଯେ, ଇନିଃ ଆଇଃକ୍ଗି ଆପେତାଃତେ ସେନ୍ ନାଗେନ୍ତେ ମନେକେଦାଏ । ୧୮ ଆଲେ ଆୟାଃଲଃ ଆତଃମିଆଁଦ୍ ହାଗାକେଲେ କୁଲିତାନା । ଇନିଃ ସୁକୁକାଜି ଉଦ୍ଦୁବ୍ରେ ସବେନ୍ କାଲିସିୟାରେ ପୁରାଃଗି ମାଇନ୍ ନାମାକାଦାଏ । ୧୯ ଏନା ଏସ୍କାର୍ କାହାଗି, ଇନିଃ ହଗି ଆବୁଆଃ ସୁନ୍ସାର୍ ହରାତେ ହବାକାନ୍ ନେ ପ୍ରାଭୁଆଃ ମାନାରାଙ୍କ୍ ଆତଃ ଆଲେୟାଃ ଜହାର୍ ଉଦ୍ଦୁବ୍ ନାଗେନ୍ତେ ଅକନ୍ଦ୍ ସାୟାଦ୍ରେୟାଃ କାମି ଆଲେ ନାମାକାଦାଲେ, ଏନାରେ ଆଲେଲଃ ହରାସେନ୍ ନାଗେନ୍ତେ କାଲିସିୟା ଇନିଃକେ ସାଲାକାଇଜା ।

୨୦ ଲେବେଃ ମନ୍ତେ ଏମାକାନ୍ ନେ ସୁନ୍ସାର୍ରେୟାଃ ବାର୍ଦାନ୍କେ ଆଲେ ପୁରାଃ ଚିର୍ଗାଲ୍ତେ ବାଉରାଅ ତାନାଲେ,

ଜେ'ଲେକାଟି ଜେତାଏ ଆଲେକେ କାକ ଚିଟା ଦାଡ଼ିୟା ।^{୨୧} ଚିୟାଠଟି ଆଲେ ପ୍ରାଭୁଆଃ ସାମ୍ବନାଙ୍ଗ୍ରେ ଏସ୍‌କାର୍ କାହାଗି ମେନ୍‌ଦ ହଡ଼କଆଃ ସାମ୍ବନାଙ୍ଗ୍ରେହ ବୁଗିନାଃଲେ ଉଡ଼ୁଡ଼ାନା ।

^{୨୨} ଏନାତେ ଆଲେ ଇନ୍‌କୁଲଃ ଆଲେୟାଃ ହାଗାକେଲେ କୁଲିତାନା । ଆଲେ ଇନିଃକେ ପୁରାଃଗି ବିଡ଼ାଅକେଦ୍‌ତେ ଇନିଃକେ ପାତିୟାରରଃ ଲେକାଲେ ନାମକିୟା । ଆପେୟାଃ ଚେତାନରେ ଆୟାଃ ପୁରାଃ ଆସ୍ରା ତାଇନ୍ ହରାତେ, ଇନିଃ ଆପେକେ ଦେଙ୍ଗାପେ ନାଗେନ୍ତେ ପୁରାଃଗି ମନେକାଦା ।^{୨୩} ତିତସ୍‌ଆଃ ପାରିତାଏ ନେଆଁତାନାଃ, ଇନିଃ ଆଇଁୟାଃ ଗାତିରେ କାମିତାନିଃ ତାନିଃ ଆତଃ ଆପେକେ ଦେଙ୍ଗାରେ ଆଇଁୟାଃଲଃ ମେସାକାନିଃ ତାନିଃ । ଆତଃ ଆଇଁୟାଃଲଃ ସେନ୍‌ତାନ ଏଟାଃ ବିଶ୍ୱାସା ହାଗାକ ହବାଅଃତାନାକ : କାଲିସିୟା ହରାତେ କୁଲକାନକ ଆତଃ ଖ୍ରୀଷ୍ଟୁଆଃ ମାନାରାଙ୍ଗ୍ ଆଉଃକେ ଲେକାନକ ତାନକ ।^{୨୪} ଏନାମେନ୍ତେ, ଇନ୍‌କୁକେ ଆପେୟାଃ ଦୁଲ୍ଲାଡ଼ ଉଦ୍‌ବକପେ । ଏନାରେ ସବେନ୍ କାଲିସିୟାକ ନେ ବିଷାଏରେ ଠାଉକା ହବାଅଃଆ ଆତଃ ଆପେ ନାଗେନ୍ତେ ଆଲେ ଆପାନକେ ମାରାଙ୍ଗ୍ ମେନ୍ତେ କାଜିନ୍‌ତାନତେୟାଃ ସାର୍‌ତି ମେନ୍ତେକ ଆଟ୍‌କାର୍ ଦାଡ଼ିୟା ।



ଏଟାଃ କାଲିସିୟାରେନ୍ ବିଶ୍ୱାସୀକ ନାଗେନ୍ତେ ଦେଙ୍ଗା

^୧ ଯିହୁଦାରେ ତାଇନ୍‌ତାନ ପାର୍‌ମେଶ୍ୱାର୍‌ଆଃ ହଡ଼କତାଃତେ ଦେଙ୍ଗା କୁଲେ ନାଗେନ୍ତେ ଆପେକେ ଜେଡ଼ନାଃ ଅଲ୍ଲ ନାଙ୍ଗ୍ କା ଲାଗାତିଙ୍ଗ୍‌ୟାଃ ।^୨ ଆଇଙ୍ଗ୍ ଆପେୟାଃ ଚିହ୍ନୁଲ୍‌ଲାନ କାମିକ ସାରିତାନାଇଙ୍ଗ୍, ଆପେ ସବେନ୍ ଇମ୍‌ତା ଦେଙ୍ଗା ନାଗେନ୍ତେପେ ସେକାଡ଼ାକାନା ଆତଃ ମାକିଦନିଆରେନ୍ ହଡ଼କଆଃ ସାମ୍ବନାଙ୍ଗ୍ରେ ଆପେୟାଃ ବିଷାଏରେ ଆଇଙ୍ଗ୍ ଆପାନକେ ମାରାଙ୍ଗ୍ ମେନ୍ତେଇଙ୍ଗ୍ କାଜିକାଦା । ଆଇଙ୍ଗ୍ କାଜିକାଦ୍ ତାଇକେନାଇଙ୍ଗ୍, “ଆଖାୟାରେନ୍ ହାଗାକ ଦେଙ୍ଗା ନାଗେନ୍ତେ ସେକାଡ଼ାକାନି ମେନାକଆ ।” ଆପେୟାଃ ଚିହ୍ନୁଲ୍‌ଲାନ କାମିକ ଇନ୍‌କୁକଏତେ ପୁରାଃ ହଡ଼କକେ ଚେଡ଼ଗାର୍ କାଦକଆ ।^୩ ନାହାଁଃ ଆଇଙ୍ଗ୍ ନେ ହାଗା ମିଶିକକେ ଆପେତାଃତେଇଙ୍ଗ୍ କୁଲକତାନା । ଜେ'ଲେକାଟି ଆପେୟାଃ

ବିଷାଏରେ ଆଲେ ଆପାନ୍‌କେ ମାରାଙ୍ଗ୍‌ୟେନ୍ କାଜିନ୍‌ତାନ୍‌ତେୟାଃ
 ଆଲକା ସାମାଏଣ୍ଡାଗଃକା । ଆଇୟାଃ କାଜି ଲେକାତେ ଆପେ ଦେଙ୍ଗା
 ଏମ୍ ନାଗେନ୍ତେ ସେକାଡାକାନ୍ ତାଇନ୍‌ପେ । ୪ ମାକିଦନିଆରେନ୍
 ହଡକ ଆଇୟାଃଲଃ ସେନ୍‌କେଦ୍‌ତେ ଆପେକେ କା ସେକାଡାକାନ୍
 ନେଲ୍‌ପେରେଦ୍, ଆପେୟାଃ ଚେତାନ୍‌ରେ ଆଲେୟାଃ ପକ୍ତା ଆସ୍ତା
 ତାଇନ୍ ହରାତେ ଆଲେ ଗିହୁଗଃଆଲେ, ସାର୍‌ତି କାଜିଲେରେ, ଏନା
 ଆପେ ନାଗେନ୍ତେୟ ଗିହୁଗଃରାଃ କାଜି ହବାଅଃଆ । ୫ ଆପେ ଦାନ୍
 ଏମ୍ ନାଗେନ୍ତେ ସିଦାରେ ବାନାର୍‌ସା ଏମାକାଦ୍ ତାଇକେନାପେ,
 ଏନାକେ ହାରମ୍ ନାଗେନ୍ତେ ଆଇଙ୍ଗ୍ ନେ ହାଗା ମିଶିକକେ ସିଦାରେ
 ଆପେତାଃତେ ସେନ୍ ନାଙ୍ଗ୍, ଆରୁତେୟାଃ ବୁଗିନାଃ ହବାଅଃଆ
 ମେନ୍ତେଇଙ୍ଗ୍ ଆଟ୍‌କାର୍‌କେଦା । ଜେ'ଲେକାଟି ଆଇଙ୍ଗ୍ ଆପେତାଃତେ
 ସେଟେର୍ ଇମ୍‌ତାଲଃ ଏନ୍ ଦାନ୍ ଉଖ୍‌ରାଅକେଦ୍‌ତେ ଦହାକାନ୍‌ଗି
 ତାଇନା । ନେଆଁ ହରାତେ ଆପେକେ ଏମ୍ ଲାଗାଡିଙ୍ଗ୍‌ୟାଃ ଲେକା
 କା ଏମ୍‌କେଦ୍‌ତେ ଆପ୍‌ନାଃ ସାନାଙ୍ଗ୍ ଲେକା ଏମ୍‌ତାନାପେ ମେନ୍ତେ
 ଉଦୁବଃଆ ।

୬ ପାହାମେପେ, କାଟିଃ ଲେକା ହିତା ହେରେତାନ୍‌ନିଃ, କାଟିଃ
 ଲେକାଗି ଇରେୟା, ଆତଃ ପୁରାଃ ହିତା ହେରେତାନ୍‌ନିଃ ପୁରାଃଗି
 ଇରେୟା । ୭ ଏନାତେ, ଅକଏ ଚିଲ୍‌କା ମନ୍‌ରେ ଉଡ଼ୁକାଦାଏ,
 ଇନିଃ ଏନ୍ ଲେକାଗି ଏମେକାଏ ଆତଃ ଇନିଃ ଏମେତାନ୍‌ତେୟାଃ
 ହୁଡିଙ୍ଗ୍‌ଜାଉତେ ଚାଏ ମାମ୍‌ରାଙ୍ଗ୍‌ତେ ଆଲକାଏ ଏମେକା । ଚିୟାଃତି
 ପାର୍‌ମେଶ୍ୱାର୍‌ଦ ରାସ୍‌କାତେ ଏମଃନିଃକେ ଦୁଲାଡାଃଏ । ୮ ସବେନ୍
 ବିଷାଏ ସବେନ୍ ଇମ୍‌ତା ପୁରାଃତେ ନାମ୍‌କେଦ୍‌ତେ, ଆପେ ଜେ'ଲେକା
 ସବେନ୍ ବୁଗିନ୍ କାମି ନାଗେନ୍ତେ ପୁରାଃ ଆଦକାଗି ଏମ୍ ଦାଡିୟାପେ,
 ଏନାମେନ୍ତେ ପାର୍‌ମେଶ୍ୱାର୍ ଆପେକେ ସବେନ୍ ଲେକାନ୍ ସାୟାଦ୍
 ପୁରାଃଗି ଏମ୍ ଦାଡିନିଃ ତାନିଃ । ୯ ଧାରାମ୍ ପୁଥ୍‌ରେ ଅଲକାନ୍
 ଲେକା, “ଇନିଃଦ୍ ରେଙ୍ଗେଃକକେ ହାଟିଙ୍ଗ୍‌କ ତାନା, ଇନିୟାଃ
 ଧାର୍‌ମାନ୍‌ତେୟାଃ ଜାନାଅ ଜାନାଅଗି ମେନାଃ ।”

୧୦ ହିତାହେର୍ ହଡକକେ ପାର୍‌ମେଶ୍ୱାର୍ ହେର୍ ନାଗେନ୍ତେ ହିତା
 ଆତଃ ଜମ୍ ନାଗେନ୍ତେ ହଲଙ୍ଗ୍ ଏମାଃଏ, ଇନିଃ ଆପେୟାଃ ଲାଗାଡିଙ୍ଗ୍
 ଲେକା ହିତାଏ ଯୋଗାଅପେୟା ଆତଃ ଏନାକେ ହାରାଇଚିୟା,
 ଆତଃ ଆପେୟାଃ ବୁଗିନ୍ ବିଷାଏରେୟାଃ ଜ ପୁରାଃଗି ପସା

ଇଦିୟଃଆ । ୧୧ ଆପେ ଜେ'ଲେକା ଲେବେଃମନ୍ତେ ଦାନ୍ ଏମ୍ ଦାଡ଼ିୟାପେ, ଏନାମେନ୍ତେ ପାର୍ମେଶ୍ୱାର୍ ଆପେକେ ସବେନ୍ ବିଷାଏରେ କିର୍ସାଣ୍ଡପେୟା ଆଡ଼ଃ ଆଲେୟାଃ ହରାତେ ଆପେ କୁଲାନାଦ୍ ଦାନ୍ ନାଗେନ୍ତେ ପୁରାଃ ହଡ଼କ ପାର୍ମେଶ୍ୱାର୍‌କେ ଧାନ୍ୟାବାଦକ ଏମାଲୟା । ୧୨ ଆପେୟାଃ ଏମଃରେୟାଃ ସେଞ୍ଜା ହରାତେ ପାର୍ମେଶ୍ୱାର୍‌ଆଃ ହଡ଼କଆଃ ଜାଞ୍ଜିଆଃତେୟାଃ ସାଞ୍ଜିନଃଆ, ଏନା ଏସ୍‌କାର୍ କାହାଗି, ମେନ୍‌ଦ ନେ ଏମଃ ହରାତେ ପୁରାଃ ହଡ଼କ ପାର୍ମେଶ୍ୱାର୍‌କେ ଧାନ୍ୟାବାଦକ ଏମାଲୟା । ୧୩ ନେ ସେଞ୍ଜାକାମି ହରାତେ ଖ୍ରୀଷ୍ଟୁଆଃ ସୁକୁକାଜି ନାଙ୍ଗ୍ ଆପେୟାଃ ପାଡ଼ିୟାର୍‌ରଃତେୟାଃ ଆଡ଼ଃ ସବେନ୍‌କଲଃ ମେନେସାରେୟାଃ ଲେବେଃମନ୍ ହରାତେ ଇନ୍‌କୁ ପାର୍ମେଶ୍ୱାର୍‌ଆଃ ମାନାରାଙ୍ଗ୍‌କ ଉଦୁବେୟା । ୧୪ ଆଡ଼ଃ ଆପେୟାଃ ନାଗେନ୍ତେ ପାର୍ମେଶ୍ୱାର୍‌ଆଃ ସାୟାଦ୍ ପୁରାଃଗି ହବାଆଃକା ମେନ୍ତେ ଇନ୍‌କୁ ପୁରାଃ ଇଛାସାନାଙ୍ଗ୍‌ଲଃ ପାର୍ମେଶ୍ୱାର୍‌ତାଃରେ ବିନ୍ତ୍ରିୟାକ । ୧୫ ଦଲାରୁ, ପାର୍ମେଶ୍ୱାର୍‌ଆଃ ପୁରାଃ ଗନଙ୍ଗ୍‌ଆନ୍ ଦାନ୍ ନାଗେନ୍ତେ, ଇନିଃକେ ଧାନ୍ୟାବାଦ୍‌ରୁ ଏମାଲୟା ।

୧୦

କା ଲାଗାତିଙ୍ଗ୍ ଉନ୍‌ଦୁବ୍‌ରେ ପାଉଲୁସ୍‌ଆଃ କାଜିରୁହାଡ଼୍

୧ ଆଇଙ୍ଗ୍ ପାଉଲୁସ୍, ଆପେକେ ଆଇୟାଃ ଆପାନ୍‌ସାଃଏତେଇଙ୍ଗ୍ ବିନ୍ତ୍ରିପେତାନା, ଚିମିନ୍ ହଡ଼କ କାଜିୟାଃକ, “ଆଇଙ୍ଗ୍ ଆପେତାଃରେ ତାଇକେନ୍ ଇମ୍‌ତା ପୁରାଃଗି ଲେବେଃମନ୍ ଆଡ଼ଃ ହୁଡ଼ିଙ୍ଗ୍‌ମନ୍ ଲେକାନ୍‌ନିଃ ତାଇକେନାଇଙ୍ଗ୍, ମେନ୍‌ଦ ଆପେତାଃହେତେ ସାଞ୍ଜିନ୍‌ତେ ସେନଃୟାନ୍‌ରେ ପୁରାଃ କେଟେଦ୍‌ମନ୍ ଲେକାନ୍‌ନିଃ ତାନିଙ୍ଗ୍ ।” ଖ୍ରୀଷ୍ଟୁଆଃ ଲେବେଃମନ୍ ଆଡ଼ଃ ଦାୟା ହରାତେ ୨ ଆଇଙ୍ଗ୍ ଆପେକେ ବିନ୍ତ୍ରିକେଦ୍‌ତେ କାଜିପେତାନାଇଙ୍ଗ୍, ଆପେଲଃ ନେପେଲ୍ ଇମ୍‌ତା ଆଇଙ୍ଗ୍‌କେ ଆପେ ଆଲ୍‌ପେ ଖ୍ୱୟଇତିଙ୍ଗ୍, ଚିୟାଃଗି ଆଲେ ସାଂସାର୍‌ରେୟାଃ ରିଡିନିଡି ଲେକା ସେସେନତାନାଲେ ମେନ୍ତେ ଅକନ୍ ହଡ଼କ କାଜିତାନାକ, ଇନ୍‌କୁଆଃ ବିରୁଧ୍‌ରେ ପୁରାଃତେ କାଜିନାଙ୍ଗ୍ ଆଇଙ୍ଗ୍ କାଇଙ୍ଗ୍ ବରତାନା । ୩ ଆରୁ ନେ ଅତେଦିଶ୍ୱମ୍‌ରେ ତାଇନଃ ତାନାରୁ ଏନା ସାର୍‌ତିଗି ତାନାଃ, ମେନ୍‌ଦ ଆରୁ ସାଂସାର୍‌ରେନ୍ ହଡ଼କ ଲାଡ଼ାଈତାନ୍ ଲେକା, କାରୁ ଲାଡ଼ାଈନ୍‌ତାନା । ୪ ମେନ୍‌ଦ ଆରୁ

ଲାଡ଼ାଇ ନାଗେନ୍ତେ ନେ ଅଡେଦିଶୁମ୍ରେୟାଃ ହାଁଡେୟାର୍ କାବୁ
 ବେଭାରଆଃ, ମେନ୍ଦ ପାରମେଶ୍ଵାରଆଃ ପେଡେୟାନ୍ ହାଁଡେୟାର୍
 ବେଭାରକେଦ୍‌ଡେ ବାଇରିକଆଃ କେଟେୟାନ୍ ହରତାନ୍ ଠାୟାଦକେ
 ଜିୟନ୍ତାନାବୁ । ଆବୁ ହସଡ ଜାଗାରକକେହ ଜିୟନ୍ତାଃବୁ ।
 * ପାରମେଶ୍ଵାରଆଃ ସେଣ୍ଡାନ୍ ବିରୁଧରେ ବିରିଦ୍‌ତାନ୍ ସବେନ୍
 କାଜିକଟଙ୍ଗଡେୟାଃକେ ଆଲେ ଆଡମ୍‌ତାଃଲେ ଆଡଃ ହଡକଆଃ
 ସବେନ୍ ଉଡ଼ୁ ଆବରରେ ଦହକେଦ୍‌ଡେ ଖ୍ରୀଷ୍ଟକେ ମାନାତିଙ୍ଗ୍
 ନାଗେନ୍ତେବୁ ବାଇକଆ । ୭ ଆଡଃ ଚିମ୍‌ତା ଆପେ ପୁରା ଖ୍ରୀଷ୍ଟଆଃ
 ମାନାତିଙ୍ଗ୍‌ତାନ୍‌କ ଲେକାପେ ହବାଅଃ ତାୟମ୍‌ଡେ, ଆପେ ଆଲାରେ
 ଜେତାଏ କା ମାନାତିଙ୍ଗ୍‌ତାନ୍‌ନିଃ ଲେକାଏ ନେଲଃରେ, ଆଲେ
 ଇନିଃକେ ସାଜାଇ ଏମ୍ ନାଗେନ୍ତେ ସେକାଡ଼ାକାନାଲେ ।

୭ ଆପେୟାଃ ଉପୁନ୍‌ସାଃରେ ଚିନାଃ ହବାଅଃତାନା, ଏନା
 ନେଲେପେ । ଆପେକଏଡେ ଜେତାଏ, ଆପାନ୍‌କେ ଖ୍ରୀଷ୍ଟଆଃ
 ତାନିଙ୍ଗ୍ ମେନ୍ତେ ବିଶ୍ଵାସତାନ୍‌ନିଃ ମେନାଇୟାଚି ? ମେନାଇରେଦ,
 ଇନିଃ ଆଡଃମିସାଏ ଉଡ଼ୁଈତା, ଚିୟାଃଚି ଇନିୟାଃ ଲେକା ଆବୁହ
 ଖ୍ରୀଷ୍ଟକେ ବିଶ୍ଵାସତାନ୍ ହଡକ ତାନ୍‌ବୁ । ୮ ଆପେକେ ଜିୟନ୍‌ପେ
 ନାଗେନ୍ତେଦ କାହା, ମେନ୍ଦ ବାଇଇଦିପେ ନାଗେନ୍ତେ ପ୍ରାଭୁ
 ଆଲେକେ ଅକ ଆକ୍‌ଡେୟାର୍ ଏମାକାଦ୍‌ଲେୟାଏ, ଏନା ନାଗେନ୍ତେ
 ଆଇଙ୍ଗ୍ ପୁରାଃଚି ଆପାନ୍‌କେ ମାରାଙ୍ଗ୍ ମେନ୍ତେଇଙ୍ଗ୍ କାଜିନ୍‌ରେଦ,
 ଏନାରେ ଆଇଙ୍ଗ୍ କାଇଙ୍ଗ୍ ଗିହୁଗଃଆ । ୯ ଆଇୟାଃ ଚିଠି ହରାଡେ
 ଆପେକେ ବଡଙ୍ଗ୍‌ପେ ନାଗେନ୍ତେ ଆଇଙ୍ଗ୍ ସାନାଙ୍ଗ୍‌ତାନା । ୧୦ ଚିମିନ୍
 ହଡକ କାଜିୟାଃ, “ପାଉଲୁସଆଃ ଚିଠିକ ପୁରାଃ ହାସୁଆନ୍‌ଗିଆ
 ଆଡଃ କେଟେୟାନ୍‌ଗିୟା, ମେନ୍ଦ ଇନିଃ ଆବୁଲଃ ତାଇକେନ୍
 ଇମ୍‌ତା ହଡ଼ମରେ କା ପେଡେୟାନ୍ ଆଡଃ ଆୟାଃ କାଜିକ ସାମାଗି
 ଲେକା ଆଟ୍‌କାରଃ ତାଇକେନା ।” ୧୧ ଏନ୍ ହଡକକେ ଆଟ୍‌କାର୍
 ଉରୁମ୍ ଲାଗାତିଙ୍ଗ୍‌ୟାଃ ଯେ, ଆଲେ ଅକ୍‌ନାଃ ସାଙ୍ଗିନ୍‌ହେଡେ
 ଚିଠିରେ ଅଲେତାନାଲେ, ଏନା ସାମ୍‌ନାଙ୍ଗ୍‌ରେ ତାଇନ୍‌କେଦ୍‌ଡେ
 କାମି ରିକାତାନ୍ ଲେକାନାଃ ତାନାଃ ।

୧୨ ଚିମିନ୍ ହଡକ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍‌ତାନ୍‌କଲଃ
 ମେସାନ୍ ଚାଏ ଇନ୍‌କୁଲଃ ଆଲେ ଆପାନ୍‌କେ ଜକାଃଅ ନାଗେନ୍ତେ
 ବରତାନାଲେ । ଇନ୍‌କୁ ଚିମିନ୍ ଉଣ୍ଡକ ତାନ୍‌କ, ଚିୟାଃଚି ଇନ୍‌କୁ

ଆକ ଆକଗି ନାପାଅଃଆକ, ଆତଃ ଆକଆଃ ଆପ୍ନାଃ ଲେକାତେଗି
 ବିଚାରଃଆକ । ୧୩ ଫେନ୍ଦ ଆବୁ ଆପାନ୍‌କେ ମାରାଙ୍ଗ୍ ଫେନ୍ତେ
 କାଜିନ୍‌ତେୟାଃ ସିମ୍‌ନାହେତେ ବାହାରିରେ ବାନଃଆ, ପାର୍‌ମେଶ୍ଵାର୍
 ଆବୁ ନାଗେନ୍ତେ ଅକନ୍ କାମି ବାଇୟାକାଦାଏ, ଏନା ସିମ୍‌ନା
 ଭିତାରରେଗି ତାଲନା ଆତଃ ଆପେ ଆଲାରେ ମେସାଅଃଆ । ୧୪ ଏନା
 ନାଗେନ୍ତେ ସିଦାତେ ଆଲେ ଖ୍ରୀଷ୍ଟଆଃ ସୁକୁକାଜି ଆପେତାଃତେ ଇଦି
 ସେଟେର୍ ଇମ୍‌ତାରେ ସିମ୍‌ନା ଭିତାରରେ ତାଇକେଦ୍‌ତେ କାଲେ କାମି
 । ୧୫ ପାର୍‌ମେଶ୍ଵାର୍ ଆବୁଆଃ ନାଗେନ୍ତେ ବାଇୟାକାଦ୍ କାମିରେୟାଃ
 ସିମ୍‌ନା ବାହାରିରେ ଏଟାଃକ କାମିରେୟାଃ ସୁଯୋଗ୍ ଇଦିକେଦ୍‌ତେ
 କାମିକାଦାକ, ଏନାରେ ଆବୁ ଆପାନ୍‌କେ ମାରାଙ୍ଗ୍ ଫେନ୍ତେ କାବୁ
 କାଜିନା । ଫେନ୍ଦ ଆଲେ ଆସ୍ରାକାଦାଲେ ଯେ, ଆପେ ବିଶ୍ଵାସ୍‌ରେ
 ହାରା ଇଦିୟଃତାନ୍‌ଲଃ ଆପେ ଆଲାରେ ଆଲେୟାଃ କାମି ଆତଃଗି
 ପାସ୍ରାଅ ଇଦିଅଃଆ । ଫେନ୍ଦ ନେଆଁ ପାର୍‌ମେଶ୍ଵାର୍ ଠାହାରାଅକାଦ୍
 ସିମ୍‌ନା ଭିତାରରେ ହବାଅଃଆ । ୧୬ ଏନରେଦ, ଏଟାଃନିୟାଃ
 କାମିରେ ହବାକାନ୍ କାମି ନାଗେନ୍ତେ ଆପାନ୍‌କେ ମାରାଙ୍ଗ୍ ଫେନ୍ତେ
 କା କାଜିକେଦ୍‌ତେ ଆପେୟାଃ ସିମ୍‌ନା ବାହାରିରେୟାଃ ଏଟାଃ
 ଦିଶ୍ଵମରେୟାଗି ଆବୁ ସୁକୁକାଜି ଉଦୁବ୍ ଦାଡିୟାବୁ ।

୧୭ ଫେନ୍ଦ ଧାରାମ୍‌ପୁଅରେ ଅଲ୍‌କାନା, “ଜେତାଏ ଆପାନ୍‌କେ
 ମାରାଙ୍ଗ୍ ଫେନ୍ତେ କାଜିନ୍ ସାନାଙ୍ଗ୍‌ନିଃ, ପ୍ରାଭୁ ରିକାକାଦ୍ କାମି
 ବିଷାଏରେ ଆପାନ୍‌କେ ମାରାଙ୍ଗ୍ ଫେନ୍ତେ କାଜିନ୍ ଲାଗାତିଙ୍ଗ୍‌ୟାଃ
 ।” ୧୮ ଚିୟାଃତି ଆପ୍‌ନାଃ ସାହାରାଅ ରିକା ହରାତେ, ଇନିଃ
 ମାଇନ୍ ନାମେନିଃ କାଏ ହବାଅଃଆ, ଫେନ୍ଦ ଜେତାଏ ପ୍ରାଭୁଆଃ
 ନେପେଲରେ ବୁଗିନାଃ ହବାଅଃଆ, ଇନିଃ ଏସ୍‌କାର୍ ମାଇନ୍ ନାମେନିଃ
 ହବାଅଃଆଏ ।

୧୧

ପାଉଲୁସ୍ ଆତଃ ହସତ୍ ପ୍ରେରିଡ୍

୧ ଆଇୟାଃ ସାନାଙ୍ଗ୍ ଯେ, ଜେତା ବିଷାଏରେ କାଟିଃଲେକା ଡଣ୍ଡ
 ହବାଅଃରେୟ ଆପେ ଆଇଙ୍ଗ୍‌କେ ସାହାତିଙ୍ଗ୍‌ପେ । ୨ ଆଇଙ୍ଗ୍‌ଦ୍
 ପାର୍‌ମେଶ୍ଵାର୍‌ଆଃ ଚିହ୍‌ଲ୍‌ଲାନ୍ ହରାତେ ଆପେ ନାଙ୍ଗ୍ ଚିହ୍‌ଲ୍‌ଲାନ୍‌ଗି
 ମେନାଇୟା, ଚିୟାଃତି ଫାର୍‌ଚିୟାକାନ୍ ଡିଣ୍ଡା କୁଡି ଲେକା

ଶ୍ରୀଷ୍ଟିଆଃ ସାମ୍ବନାଙ୍କରେ ତିରୁଦାଡ଼ିପେ ମେନ୍ତେ ଆଇଙ୍ଗ୍ ମିଆଁଦଗି କଡ଼ାନାଙ୍ଗ୍ ଆପେୟାଃ କାଜିଇଙ୍ଗ୍ ବାଇୟାକାଦା । ୩ ମେନ୍ଦଦ ବିଙ୍ଗ୍ ଆୟାଃ ଚାଡୁର୍ ହସଡ଼ ହରାଡେ ହାଞ୍ଜାକେ ବେଦାକିଃ ଲେକା, ଆପେୟଗି ଶ୍ରୀଷ୍ଟକେ ପୁରା ବାଗିୟାପେ ଆଡ଼ଃ ଫାର୍ଡିନ୍ ପାଡିୟାରରେନ୍ଦତାଃଏଡେ ବିଗ୍ଡ଼ାଅଃଆପେ, ମେନ୍ତେ ଆଇଁୟାଃ ବର ମେନାଃ । ୪ ଚିୟାଃଚି ଜେତାଏ ହିଜୁଃକେଦଡେ ଆଲେ ଉଦୁବାକାଇ ଯାଶୁକେ ବାଗିକେଦଡେ ଏଟାଃ ଜେତା ଯାଶୁଆଃ କାଜିକ ଉଦୁବେୟା ଚାଏ ଆପେ ନାମାକାଦ୍ ଆମ୍ବାକେ ବାଗିକେଦଡେ ଏଟାଃ ଜେତା ଆମ୍ବାରାଃ କାଜିକ କାଜିୟା ଚାଏ ଆପେ ତେଲା ଦାରମ୍ବାକାଦ୍ ସୁକୁକାଜି ବାଗିକେଦଡେ ଏଟାଃ ଜେତା ସୁକୁକାଜିକ ଉଦୁବେୟା ଆଡ଼ଃ ଆପେ ଏନାକେ ସୁକୁଡେପେ ତେଲା ତାନରେଦ, ସାମାରେ ଏନାକେପେ ତେଲା ଦାରମ୍ବାକାଦା ।

୫ ଆପେୟାଃ ଏନ୍ ମାପ୍ପରାଙ୍ଗ୍ ପ୍ରେରିଡ଼କତାଃଏଡେ ଆଇଙ୍ଗ୍ ଜେତାଲେକାଡେ ହୁଡିଙ୍ଗ୍ ମେନ୍ତେ କାଇଙ୍ଗ୍ ଆଟ୍‌କାରେନ୍ଦତାନା । ୬ ହବାସାକାଅଆଃ, ଜାଗାରରେ ଆଇଙ୍ଗ୍ ଡଣ୍ଡିଗିୟାଇଙ୍ଗ୍, ମେନ୍ଦଦ ସେଣ୍ଡିନ୍ରେ ଡଣ୍ଡି ନାହାଁଲିଙ୍ଗ୍ । ଆପେକେ ନେ କାଜିକ ଆଲେ ସବେନ୍ ଇମ୍ତା ଆଡ଼ଃ ସବେନ୍ ଲେକାଡେ କାଜି ଆଉପେତାନାଲେ ।

୭ ପାରମେଶ୍ୱାରଆଃ ସୁକୁକାଜି ଉଦୁବ୍ ଇମ୍ତା ଆଇଙ୍ଗ୍ ଆପେତାଃଏଡେ ନେଆଁରାଃ ଗନଙ୍ଗ୍ କାଇଙ୍ଗ୍ ଆସି । ଆଇଙ୍ଗ୍ ଆପେକେ ବିଶେଷ୍ ହଡ଼ ବାଇପେ ନାଗେନ୍ତେ ଆପାନ୍‌କେଇଙ୍ଗ୍ ହୁଡିଙ୍ଗ୍‌ୟେନ୍‌ୟାନା । ନେଆଁ ଚିନାଃ ଆଇଁୟାଃ ଗୁହ୍ନାଁ ତାନାଃ ? 「ଆପେୟାଃ ଆଲାରେ କାମିତାନ୍ ଇମ୍ତା ଆଇଙ୍ଗ୍ ଏଟାଃ କାଲିସିୟାକତାଃଏଡେ ଏମଃରେ ଦେଙ୍ଗାଇଙ୍ଗ୍ ନାମାକାଦା । କାଜିଲେରେ, ଆପେୟାଃ ଦେଙ୍ଗା ନାଗେନ୍ତେ ଆଇଙ୍ଗ୍ ଇନ୍‌କୁକେଇଙ୍ଗ୍ ରେଏଃକାଦକଆ । ୯ ✽ଆପେଲଃ ତାଇକେନ୍ ଇମ୍ତା ଆଇଁୟାଃ ଜାଞ୍ଜିଅଃଡେୟାଃ ପୁରାଅଃ ନାଗେନ୍ତେ ଆଇଙ୍ଗ୍ ଜେତାଏକେ ଉଡ଼଼ରେ କାଇଙ୍ଗ୍ ଉୟଃକାଦକଆ । ଚିୟାଃଚି ମାକିଦନିଆଏଡେ ହିଜୁଃକାନ୍ ହାଗା ମିଶିକ ଆଇଁୟାଃ ସବେନ୍ ଜାଞ୍ଜିକାନ୍‌ଡେୟାଃ ଏମାଦିୟାକ । ସିଦା ଦିପିଲି ଲେକା ହିଜୁଃ ଦିପିଲିରେୟ ଆଇଙ୍ଗ୍ ଚିଉଲାଅ

✽ ୧୧:୯ ୧୧:୯ ଡିଲିପିୟ ୪:୧୫-୧୮.

ଆପେକେ ବାହାରମ୍ କାଉଁ ଲାଦିପେୟା । ୧୦ ଆଉଁକ୍ରେ ତାଉକାନ ଶ୍ରୀଷ୍ଟିଆଃ ସାନାର୍ତ୍ତି ହରାତେ, ଆଉଁକ୍ ବାନାର୍ତ୍ତା ଏମ୍‌କେଦ୍‌ତେ କାଜିତାନାଉଁକ୍ ଯେ, ଆଉଁକ୍ ଆପାନ୍କେ ମାରାଉଁ ମେନ୍ତେ କାଜିନ୍‌ତେୟାଃକେ, ଆଖାୟା ଦିଶୁମ୍‌ରେୟାଃ ଜେତାନ ପାରଗାନରେ ହାପାକେଦ୍‌ତେ ତାଉନ୍ କା ଦାଡ଼ିୟାଆ । ୧୧ ଆଉଁକ୍ ଚିନାଃ ମେନ୍ତେ ନେ'ଲେକା କାଜିତାନାଉଁକ୍ ? ଆଉଁକ୍ ଚିନାଃ ଆପେକେ କାଉଁକ୍ ଦୁଲ୍ଲାଡ଼ପେ ତାନା ? ଆଉଁକ୍ ଆପେକେ ଚିମିନ୍ ଦୁଲ୍ଲାଡ଼ପେ ତାନତେୟାଃ, ପାରମେଶ୍ଵାର ସାରିତାନାଏ ।

୧୨ ମେନ୍‌ଦ ନାହାଁଃ ଆଉଁକ୍ ଅକ୍‌ନାଃ କାମିତାନତେୟାଃ, କାମି ଇଦିକାତେୟାଃଇ । ଏନାରେଦ, ଆଲେ ଲେକା କାମିତାନାକ ମେନ୍ତେ ଅକନ୍ ଏଟାଃ ବିଷେଶ୍ “ପ୍ରେରିତ୍‌କ” ଆପାନ୍କେ ମାରାଉଁ ମେନ୍ତେକ କାଜିନ୍‌ତାନା, ଇନ୍‌କୁ ଆଡ଼ଃ ଏନା କାକ ରିକାଦାଡ଼ିୟା । ୧୩ ଏନ୍‌ଲେକାନ ହଡ଼କଦ ହସଡ଼ ପ୍ରେରିତ୍‌କ ତାନକ ଆଡ଼ଃ ବେଦା କାମିତାନ ହଡ଼କତାନକ, ଆକଆଃ କାମି ବିଷାଏରେ ବେଦା କାଜି କାଜିୟାଃକ ଆଡ଼ଃ ଶ୍ରୀଷ୍ଟିଆଃ ପ୍ରେରିତ୍‌କ ଲେକା ନେଲଃ ନାଗେନ୍ତେ ଶ୍ରୀଷ୍ଟିଆଃ ପ୍ରେରିତ୍‌କ ଲେକାକ ବାଇୟେନା । ୧୪ ନେଆଁରେ ଆକ୍‌ଦାଦାଅ ହବାଅଃରେୟାଃ ଜେତାନ କାଜି ବାନଃଆ, ଚିୟାଃଚି ସାଏତାନହଁ ଆଇଃକ୍‌ଗି ମାସ୍ତାଲ୍‌ରେନ୍ ଦୁଡ଼ ଲେକା ନେଲଃ ନାଗେନ୍ତେ ମାସ୍ତାଲ୍‌ରେନ୍ ଦୁଡ଼ ଲେକାଏ ବାଇୟେନା । ୧୫ ଏନାତେ ଏନ୍ ଭେସ୍ ବାଦ୍‌ଲାଅ ତାନନିୟାଃ ଦାସିକ, ଧାରମାନ ଦାସିକ ଲେକା ବାଇୟେନ୍‌ରେଦ, ଏନାରେ ଆକ୍‌ଦାଦାଅ ହବାଅଃରେୟାଃ ଜେତାନ କାଜି ବାନଃଆ, ମେନ୍‌ଦ ଇନ୍‌କୁଆଃ ଚୁଣ୍ଡୁ ଆକଆଃ କାମି ଲେକାଗି ହବାଅଃଆ ।

ପ୍ରେରିତ୍ ଲେକା ପାଉଲୁସଆଃ ଦୁକୁହାସୁ

୧୬ ଆଉଁକ୍ ଆଡ଼ଃଗିଉଁକ୍ କାଜିତାନା, ଜେତାଏ ଆଉଁକ୍‌କେ ଡଣ୍ଡ ମେନ୍ତେ ଆଲକାଏ ଆଡ଼କାରିଉଁକା, ମେନ୍‌ଦ ଆପେ ଏନ୍‌ଲେକା ଆଡ଼କାରିଉଁ ରେୟା, ଆଉଁକ୍‌କେ ଡଣ୍ଡ ଲେକା ଦାରମିଉଁକ୍‌ପେ, ଜେ'ଲେକା ଆଉଁକ୍ ଆପାନ୍କେ ମାରାଉଁ ମେନ୍ତେ କାଜି ନାଉଁ କାଟିଃଲେକା ନେତାଉଁକ୍ ନାମେୟା । ୧୭ ସାର୍‌ତିଗି, ନାହାଁଃ ଆଉଁକ୍ କାଜିତାନତେୟାଃ, ଏନା ପ୍ରାଭୁଆଃ କାଜି ଲେକାତେ କାଉଁକ୍

କାଜିତାନା । ଚିୟାଃଚି ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ ବିଷାଏରେ ଡଣ୍ଡ ଲେକାଇଙ୍ଗ୍ କାଜିତାନା । ୧୮ ମେନ୍‌ଦ ସାଂସାର୍ ବିଷାଏରେ ପୁରାଃ ହଡ଼କ ଆପାନ୍‌କେ ମାରାଙ୍ଗ୍ ମେନ୍ତେକ କାଜିନା, ଆଇଙ୍ଗ୍‌ହ୍ ଏନ୍ ଲେକାଗିଇଙ୍ଗ୍ ରିକା ଦାଡ଼ିୟା । ୧୯ ଆପେଦ ସେଣ୍‌ନ୍ ହବାକାନ୍‌ରେୟ ରାସ୍‌କାତେ ଡଣ୍ଡକକେପେ ସାହାତିଙ୍ଗ୍‌କ ତାନା । ୨୦ ଜେତା ହଡ଼ ଆପେକେ ଦାସିଲେକାଏ ଦହପେରେ, ଆପେୟାଃ ଖୁଜ୍‌କଏ ନକ୍‌ସାନେରେ, ଜେତାଏ ଆପେକେ ଫାନ୍‌ରେ ଉୟାଃପେରେ, ହିଲାଇଙ୍ଗ୍‌ପେରେ, ଆଡ଼ଃ ଆପେୟାଃ ଜଆରେ ଚାଟ୍‌କାନ୍‌ପେରେୟ ଆପେ ଏନାକେ ସାହାତିଙ୍ଗ୍‌ୟେପେ । ୨୧ ଆଇଙ୍ଗ୍ ଗିହୁଗଃତାନ୍‌ଲଃ କାଜିତାନାଇଙ୍ଗ୍ ଯେ, ନେ ସବେନ୍ ବିଷାଏରେ ଆଲେଦ ନାରାଦୁରାଗିୟାଲେ । ମେନ୍‌ଦ ଏଗଃ ଜାହାନ୍ ବିଷାଏରେ ଜେତାଏ ଆପାନ୍‌କେ ମାରାଙ୍ଗ୍ ମେନ୍ତେ କାଜି ନାଙ୍ଗ୍ ଜୀଉରେ କେଟେଦ୍‌ଜେ ତାନ୍‌ରେଦ୍, ଆଇଙ୍ଗ୍ ଡଣ୍ଡ ଲେକାଇଙ୍ଗ୍ କାଜିତାନା, ଆଇଙ୍ଗ୍‌ୟାଃ ହଗି ଏନ୍ ଲେକା ଜୀଉରେ କେଟେଦ୍ ମେନଃ । ୨୨ ଇନ୍‌କୁ ଚିୟାଃ ଏବ୍ରୀ ତାନ୍‌କ ? ଆଇଙ୍ଗ୍‌ହଗି ଏବ୍ରୀ ହଡ଼ ତାନିଙ୍ଗ୍ । ଇନ୍‌କୁ ଚିନାଃ ଇସ୍‌ସାଏଲ୍‌ରେନ୍ ତାନ୍‌କ ? ଆଇଙ୍ଗ୍‌ହଗି ଇସ୍‌ସାଏଲ୍‌ରେନ୍ ତାନିଙ୍ଗ୍ । ଇନ୍‌କୁ ଚିୟାଃ ଆବ୍ରାହାମ୍‌ଆଃ କିଲିରେନ୍‌କ ତାନ୍‌କ ? ଆଇଙ୍ଗ୍‌ହଗି ଆବ୍ରାହାମ୍‌ଆଃ କିଲିରେନ୍ ତାନିଙ୍ଗ୍ । ୨୩ ☆ଇନ୍‌କୁ ଚିୟାଃ ଶ୍ରୀଷ୍ଟିଆଃ ଦାସିକ ତାନ୍‌କ ? ଆଇଙ୍ଗ୍ ବାଏହା ହଡ଼ ଲେକାଇଙ୍ଗ୍ କାଜି ତାନା, ଆଇଙ୍ଗ୍ ଇନ୍‌କୁତାଃଏତେ ପୁରାଃ ବୁଗିନ୍ ଦାସି ତାନିଙ୍ଗ୍ । ଆଇଙ୍ଗ୍ ଇନ୍‌କୁତାଃଏତେ ଆଦ୍‌କା ପୁରାଃ କେଟେଦ୍‌କାମିଇଙ୍ଗ୍ କାମିକାଦା, ପୁରାଃତେଇଙ୍ଗ୍ ଜେହେଲ୍‌କାନା, ଆଡ଼ଃ ପୁରାଃଗି ଚାବୁକ୍‌ତେଇଙ୍ଗ୍ ହାଁଶ୍‌ସାକାନା ଆଡ଼ଃ ଚିମିନ୍‌ସା ଲେକା ଗଜଃ ଲେକାଇଙ୍ଗ୍ ହବାକାନା । ୨୪ ପାଞ୍ଚ ଧାଅଁ ଯିହୁଦୀକତାଃଏତେ ମିଦ୍‌ହିସି ଗେଲ୍‌ଅରେୟା* ଚାବୁକ୍‌ତେଇଙ୍ଗ୍ ହାଁଶ୍‌ସାୟାନା । ୨୫ ☆ଆପିସା ରୋମ୍‌ରେନ୍‌କତାଃଏତେ ଚାବୁକ୍‌ତେଇଙ୍ଗ୍ ହାଁଶ୍‌ସାୟାନା । ମିସା ଦିରିଲଃ ଚିଦ୍‌ଗିୟାନାଇଙ୍ଗ୍ ଆଡ଼ଃ ମିଦ୍ ନିଦାସିଙ୍ଗି ଦାଆଃରେଇଙ୍ଗ୍ ତାଇନ୍‌ୟାନା । ୨୬ ☆ଆଇଙ୍ଗ୍‌ୟାଃ ହରାସେନ୍‌ରେ

☆ ୧୧:୨୩ ୧୧:୨୩ ପ୍ରେରିଡ୍ ୧୭:୨୩. * ୧୧:୨୪ ୧୧:୨୪ ଅନାଇସ୍ ☆ ୧୧:୨୫ ୧୧:୨୫ ପ୍ରେରିଡ୍ ୧୭:୨୨; ପ୍ରେରିଡ୍ ୧୪:୧୯. ☆ ୧୧:୨୬ ୧୧:୨୬ ପ୍ରେରିଡ୍ ୯:୨୩; ପ୍ରେରିଡ୍ ୧୪:୫.

ଆଇଁଙ୍କ ପୁରାଃସା ଦାଆଃ ଟୁଡାକଏତେ, ରେରେଃକକତାଃଏତେ, ଯିହୁଦୀକତାଃଏତେ, ସାଅଁସାର୍ ହଡ଼କତାଃଏତେ, ଜୀଉତାଇଁଙ୍କ ଗଜଃ ଲେକା ହବାୟାନା ଆଡ଼ଃ ସାହାର୍‌କରେ, ବିର୍‌ରେ, ଦରେୟାରେ, ହସଡ଼ ଗାଡ଼ିକତାଃଏତେ ଜୀଉତାଇଁଙ୍କ ଗଜଃ ଲେକା ହବାୟାନା । ୨୭ ପୁରାଃଗି କେଟେଦକାମିଙ୍ଗ କାମିକାଦା ଆଡ଼ଃ ଦୁକୁହାସୁଇଁଙ୍କ ସାହାଡ଼ିଙ୍ଗକାଦା, ବେଗାର୍ ଦୁଡ଼ମୁତେ, ରେଙ୍ଗେଃ କାଟାବକେଦତେ ପୁରାଃ ମାହାଁ ତାଇକେନାଇଁଙ୍କ, ଲାଗାଡ଼ିଙ୍ଗ ଜମେୟାଃ, ଲିଜାଃ ଆଡ଼ଃ ତାଇନଃ ନାଙ୍ଗ୍ ଠାୟାଦ୍ କା ତାଇକେନ୍ ହାରାତେ ପୁରାଃ ଦୁକୁଇଁଙ୍କ ସାହାଡ଼ିଙ୍ଗକାଦା । ୨୮ ନେ ସବେନାଃ ହବାକେଦତେୟ, ସବେନ୍ କାଲିସିୟା ନାଗେନ୍ତେ ଆଇଁୟାଃ ଉଡ଼ଃ ସବେନ୍ ହୁଲାଙ୍ଗ୍ ଆଇଁଙ୍କେ ଉଡ଼ଃତେ ଅତାକାଦିୟାଁ । ୨୯ ଜେତାଏ ନାରାଦୁରା ହବାଅଃତାନରେ, ଆଇଁଙ୍କହଁ ଇନିଃଲଃ ନାରାଦୁରା ଆଟ୍‌କାରେୟାଇଁଙ୍କ । ଜେତାଏ ପାପକାମି ରିକାଏରେ, ଆଇଁଙ୍କ ମନ୍‌ରେ ପୁରାଃଗିଇଁଙ୍କ ନାରାଜଃଆ ।

୩୦ ଆଇଁଙ୍କ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ ହବାଅଃରେ, ଆଇଁୟାଃ ନେ ସବେନ୍ ନାରାଦୁରା ନାଗେନ୍ତେ ଆଇଁଙ୍କ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ ହବାଅଃଆ । ୩୧ ଆଇଁଙ୍କ କାଇଁଙ୍କ ବେଦାତାନା, ଏନା ପାର୍‌ମେଶ୍ୱାର୍ ଆଡ଼ଃ ଆରୁଆଃ ପ୍ରାଭୁ ଯୀଶୁଆଃ ଆପୁ ସାରିତାନାଏ । ଇନିୟାଃ ଜାନାଅ ଜାନାଅଗି ସାହାରାଅ ହବାଅଃକା । ୩୨ ଆଇଁଙ୍କ ଦମାସକସରେ ତାଇନ୍‌ତାନ୍ ଇମତା ରାଜା ଆରିସ୍ତାକ୍‌ଆଃ ହାକିମ୍ ଆଇଁଙ୍କେ ତଲ୍‌ଇଦି ନାଗେନ୍ତେ ନାଗାର୍‌ରେୟାଃ ଚାରିୟସାଃରେ ହର ହଡ଼କକେ ଦହକାଦକ ତାଇକେନା । ୩୩ ମେନ୍‌ଦ ଆଇଁଙ୍କେ ମାରାଙ୍ଗ୍ ଟୁଙ୍ଗିରେ ଦହକେଦତେ ନାଗାର୍‌ରେୟାଃ ପାର୍‌ରିରାଃ ଖଡ଼କି ହରା ବାହାରିତେ ତୁଙ୍ଗା ଆଡ଼଼ଗୁକେଦିୟାଁ, ନେ ଲେକାତେ ଆଇଁଙ୍କ ଇନିଃତାଃଏତେଇଁଙ୍କ ନିର୍‌ୟାନା ।

୧୨

ପାଉଲୁସ୍‌ଆଃ ଦାର୍‌ଗାନ୍ ଉନୁଦୁବକାଜି

୧ ଜେତାନ୍ ବୁଗିନାଃ କା ହବାଅଃରେୟ, ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ ଲାଗାତିଙ୍ଗ୍‌ୟାଃ । ମେନ୍‌ଦ ପ୍ରାଭୁ ଆଇଙ୍ଗ୍‌କେ ଏମାକାଦିଙ୍ଗ୍ ସବେନ୍ ଦାର୍‌ଗାନ୍ ଆଡ଼ଃ ଉନ୍ନୁଦୁବକାଜିକ ନାହାଃଇଙ୍ଗ୍ ଉଦୁବେୟା । ୨ ଆଇଙ୍ଗ୍ ଶ୍ରୀଷ୍ଟରେ ଆସ୍ରାଏତାନ୍ ମିଆଁଦ୍ ହଡ଼କେଇଙ୍ଗ୍ ସାରିୟାଃ, ଇନିଃଦ ଗେଲ୍‌ଉପୁନ୍ ବାରାଷ୍ ସିଦାରେ ଆପିୟା ସିର୍ମା ଦିଶୁମ୍‌ତେ ସେନ୍‌କାନ୍ ତାଇକେନା । ଇନିଃ ଆୟାଃ ଗନଏଃ ହଡ଼ମତେଗି ସେନ୍‌କେନା ଚି କୁମ୍‌ରେ ନେଲ୍‌କେଦା, ଏନା କାଇଙ୍ଗ୍ ସାରିୟା ? ଏନାଦ ପାର୍‌ମେଶ୍ୱାର୍ ଏସ୍‌କାର୍ ସାରିୟାଏ । ୩ ଆଡ଼ଃଗିଇଙ୍ଗ୍ କାଜିତାନା, ଇନିଃକେ ସିର୍ମାରେୟାଃ ବାଗାନ୍‌ତେ ଇଦିକାନ୍ ତାଇକେନା । ଇନିଃ ଆୟାଃ ସାଂସାର୍ ହଡ଼ମତେଗି ସେନ୍‌କେନା ଚି କୁମ୍‌ରେ ନେଲ୍‌କେଦା, ଏନା କାଇଙ୍ଗ୍ ସାରିୟା ? ଏନାଦ ପାର୍‌ମେଶ୍ୱାର୍ ଏସ୍‌କାର୍ ସାରିୟାଏ । ୪ ଏନ୍ ପାରାଦେସ୍‌ରେ ଇନିଃ ଜାଗାର୍‌ରେ କା କାଜି ଦାଡ଼ିୟଃତାନ୍ ଆଡ଼ଃ ପୁର୍‌ତାଅକେଦ୍‌ତେ କାଜି କା ଦାଡ଼ିୟଃତାନ୍ ଜାଗାର୍ ଆୟୁମ୍ ଦାଡ଼ିକେଦାଇଙ୍ଗ୍ । ୫ ନେ ହଡ଼ ନାଗେନ୍ତେ ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେଇଙ୍ଗ୍ କାଜିନ୍ ତାନା । ମେନ୍‌ଦ ଆଇଙ୍ଗ୍‌ୟାଃ ନାରାଦୁରାକେ ଉଦୁବେତେୟାଃକେ ବାଗିକେଦ୍‌ତେ ଏଟାଃ ଜେତାନ୍ ବିଷାଏରେ ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେ କାଇଙ୍ଗ୍ କାଜିନା । ୬ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ ନାଙ୍ଗ୍ ଆଇଙ୍ଗ୍‌ୟାଃ ନାଗେନ୍ତେ ଡ଼ଣ୍ଡୁ କା ହବାଅଃଆ, ଚିୟାଃଚି ଆଇଙ୍ଗ୍‌ଦ ସାର୍‌ତି କାଜି କାଜିତାନାଇଙ୍ଗ୍ । ମେନ୍‌ଦ ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେ କାଜିନ୍ କାଇଙ୍ଗ୍ ସାନାଙ୍ଗ୍ ତାନା, ହଡ଼କ ଆଇଙ୍ଗ୍‌କେ ଜେ'ଲେକା କାମି ନାଗେନ୍ତେ ନେଲିୟାକ ଆଡ଼ଃ ଆଇଙ୍ଗ୍‌ୟାଃତାଃଏତେ ଜେ'ଲେକା କାଜି ଆୟୁମେୟାକ, ଏନାଏତେ ଆଇଙ୍ଗ୍‌କେ ମାରାଙ୍ଗ୍ ମେନ୍ତେ ଆଲ୍‌ପେ ଆଟ୍‌କାରିୟା ।

୭ ମେନ୍‌ଦ ଆଇଙ୍ଗ୍ ପାର୍‌ମେଶ୍ୱାର୍‌ତାଃଏତେ ଉଦୁବାକାନ୍ ନେ ଲେକାନ୍ ଆକ୍‌ଦାନ୍‌ଆ କାମିକଇଙ୍ଗ୍ ନାମାକାଦ୍‌ରେୟ, ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେ ଆଲ୍‌କାଇଙ୍ଗ୍ କାଜିନ୍‌କା ମେନ୍ତେ ଆଇଙ୍ଗ୍‌ୟାଃ ହଡ଼ମରେ ହାସୁଇଙ୍ଗ୍ ନାଙ୍ଗ୍ ମିଆଁଦ୍ ଜାନୁମ୍ ଲେକା ଏମାକାନା, ନେଆଁ ଆଇଙ୍ଗ୍‌ରେ ସାଏତାନ୍‌ରାଃ କାଜିକୁଲ୍‌ନିଃ ଲେକାଏ କାମିୟା, ଜେ'ଲେକାଚି ଆଇଙ୍ଗ୍ ପୁରାଃଗି ଆପାନ୍‌କେ ମାରାଙ୍ଗ୍ ମେନ୍ତେ

କାଜି କାଇଙ୍ଗ ଦାଡ଼ିୟା । ୮ ନେଆଁକେ ସାଜିନେ ନାଗେନ୍ତେ ଆଇଙ୍ଗ ଆପିସା ପ୍ରାଭୁତାଃରେଇଙ୍ଗ ବିନ୍ତ୍ରକେଦା, ୯ ମେନ୍ଦ ଇନିଃ ଆଇଙ୍ଗକେ କାଜିକିୟା, “ଆଇଁୟାଃ ସାୟାଦ୍ ଆପେ ନାଗେନ୍ତେ ପୁରାଃଗିୟା, ଆପେ ନାରାଦୁରାଃଅ ଇମ୍ତା ଆଇଁୟାଃ ପେଡ଼େଃ ପୁରାଃଗିଆ ।” ଏନାଡେ ଶ୍ରୀଷ୍ଟିଆଃ ପେଡ଼େଃ ଆଇଙ୍ଗତାଃରେ ତାଇନଃ ନାଙ୍ଗ ଆଇଙ୍ଗ ଆଇଁୟାଃ ନାରାଦୁରା ନାଗେନ୍ତେ ପୁରାଃଗି ଆପାନ୍‌କେ ମାରାଙ୍ଗ ମେନ୍ତେ କାଜିନାଇଙ୍ଗ ଆତଃ ରାସ୍‌କାଅଃଆଇଙ୍ଗ । ୧୦ ଶ୍ରୀଷ୍ଟି ନାଗେନ୍ତେ ଆଇଙ୍ଗ ସବେନ୍ ଲେକାନ୍ ନାରାଦୁରା, ହିନିସ୍ତା, ସାସାଡି, ଆତଃ ସିଗିଦ୍ ହବାଅଃରେୟ ରାସ୍‌କାଅଃଆଇଙ୍ଗ, ଚିୟାଃଚି ଆଇଙ୍ଗ ନାରାଦୁରାଃଅ ଇମ୍ତା ପେଡ଼େଜଃଆଇଙ୍ଗ ।

କବିଚ୍ଛିନ୍ଦରେନ୍ ହଡକଆଃ ନାଗେନ୍ତେ ପାଉଲୁସ୍‌ଆଃ ଉଡ଼ୁ

୧୧ ଆଇଙ୍ଗ ଡଣ୍ଡ ଲେକାଇଙ୍ଗ କାମିତାନା । ନେଆଁ କାମି ନାଗେନ୍ତେ ଆପେ ଆଇଙ୍ଗକେ ଜାବାର୍‌ଜାସ୍ତି କାଦିୟାପେ, ଚିୟାଃଚି ଆଇଁୟାଃ ସାହାରାଅ ରିକା ନାଗେନ୍ତେ ଆପେୟାଃ ଲାଗାତିଙ୍ଗ ତାଇକେନା । ଆଇଙ୍ଗ ଜେତାନିଃ ନାହାଁଲାଇଙ୍ଗରେୟ ଆପେୟାଃ ଏନ୍ ମାପ୍‌ରାଙ୍ଗ ପ୍ରେରିଡକତାଃଏଡେ ଜେତାରେୟ ହୁଡିଙ୍ଗ ନାହାଁଲାଇଙ୍ଗ । ୧୨ ପୁରାଃ ଆକ୍‌ଦାନ୍‌ଆ ଅତଃ ଆକ୍‌ଚାକାଅ କାମିକ ପୁରାଃ ଧୂରାଜ୍ ସାବ୍‌କେଦ୍‌ଡେ ଆପେ ଆଲ୍‌ରେଇଙ୍ଗ ରିକାକାଦା, ଏନା ସାବୁଦ୍ ଏମେତାନାଏ ଯେ, ଆଇଙ୍ଗ ପ୍ରେରିଡ ତାନିଙ୍ଗ । ୧୩ ମିଆଁଦ୍ ବିଷାଏରେ ଏସ୍‌କାର୍ ଆଇଙ୍ଗ ଏଟାଃ ଏଟାଃ କାଲିସିୟାତାଃଏଡେ ଆପେଲଃ ଏଟାଃ ଲେକାଇଙ୍ଗ ବେଭାର୍‌କାଦା । ଆଇଙ୍ଗ ଆପେୟାଃ ଚେତାନରେ ବାହାରମ୍ ଲେକା କାଇଙ୍ଗ ହବାକାନା । ଏନ୍ ଏଡକାନ୍‌ଆଃ ନାଗେନ୍ତେ ଆଇଙ୍ଗକେ ଛାମାଲଙ୍ଗପେ ।

୧୪ ଆଇଙ୍ଗ ଆପିସାଡେ ଆପେତାଃଡେ ସେନ୍ ନାଗେନ୍ତେ ସେକାଡେନ୍ ତାନାଇଙ୍ଗ । ଆଇଙ୍ଗ ଆପେତାଃଏଡେ ଜେଡନାଃ କାଇଙ୍ଗ ହାଚି । ଆଇଙ୍ଗ ଆପେକେଇଙ୍ଗ ସାନାଙ୍ଗତାନା, ଆପେୟାଃ ଟାକା ପାଏସା କାହାଗି । ଚିୟାଃଚି ଏଙ୍ଗାଆପୁକଆଃ ନାଗେନ୍ତେ ହନ୍‌କକେ ଜଗାଅ ନାଙ୍ଗ କା ଲାଗାତିଙ୍ଗୟାଃ, ମେନ୍ଦ୍ ହନ୍‌କଆଃ ନାଗେନ୍ତେ ଏଙ୍ଗାଆପୁକ ଜଗାଏୟା । ୧୫ ଆଇଙ୍ଗ ଆପେୟାଃ ଜାଉରେ ଆପେକେ ଦେଙ୍ଗାପେ ନାଗେନ୍ତେ ଆଇଁୟାଃ ସବେନାଃ ଏମ୍‌କେଦାଇଙ୍ଗ, ନେ'ଲେକାଚି ଆଇଙ୍ଗ ଆପାନ୍‌କେ ରାସ୍‌କାଡେ

ଏମ୍ ନାଗେନ୍ଦ୍ରେଇଙ୍କ ସେକାଡ଼ାକାନା । ଆଇଙ୍କ ଆପେକେ ନିମିନ୍ ପୁରାଃଗିଇଙ୍କ ଦୁଲାଡ଼ପେ ତାନା ମେନ୍ତେ ଚିନାଃ ଆପେ ଆଇଙ୍କକେ ନିମିନ୍ କାଟିଃଗି ଦୁଲାଡ଼ିୟାପେ ?

୧୭ ଆଇଙ୍କ ଆପେୟାଃ ଚେତାନରେ ବାହାରମ୍ ଲାଦିୟାକାନ୍ ଲେକା କାଇଙ୍କ ହବାକାନା । ନେ କାଜି ସାର୍ତ୍ତିତାନାଃ ମେନ୍ତେ ମିଦମନ୍ ହବାଅଃଆପେ । ମେନ୍ଦ ଆପେକଏତେ ଜେତାଏ କାଜିୟାଏ, ଆଇଙ୍କ ଚାଲାକ୍ତେ ଆପେକେ ହସଡ଼ କାଜିତାନଲଃ ଫାନ୍ଦିରେଇଙ୍କ ଉୟୁଃକାଦପେୟା । ୧୭ ଆପେତାଃତେ ଅକନକକେ କୁଲାକାଦକଆଇଙ୍କ, ଇନ୍କୁକଏତେ ଜେତାଏୟାଃ ହରାତେ ଆଇଙ୍କ ଚିନାଃ ଆପେତାଃଏତେ ଜେତାନ୍ ସୁଯୋଗ୍ ଇଦିକାଦାଇଙ୍କ । ୧୮ ଆଇଙ୍କ ତିତସ୍ତକେ ଆପେତାଃତେ ସେନ୍ ନାଗେନ୍ଦ୍ରେଇଙ୍କ ବିନ୍ଦିକିୟା ଆତଃ ଇନିଃଲଃ ଏତାଃ ହାଗାକେଇଙ୍କ କୁଲ୍କିୟା । ତିତସ୍ ଆପେତାଃଏତେ ସୁଯୋଗ୍ ଇଦିକାଦାଏ ମେନ୍ତେ ଚିୟାଃ ଜେତାଏ କାଜି ଦାଡ଼ିୟାପେ ? ଇନିଃ ଆତଃ ଆଇଙ୍କ ଚିନାଃ ମିଦମନତେ କାଲିଙ୍କ ସେସେନ୍କାଦା ? ଆଲିଙ୍କୟାଃ ଚାଇଲ୍ ଚାଲାନ୍ ଚିନାଃ ମିଦଲେକାଗି ବାନଃଆ ?

୧୯ ହବାସାକାଅଆଃ, ଆପେ ନାହାଃ ଜାକେଦପେ ଉଡ଼ୁତାନା ଯେ, ଆଲେ ଆପେୟାଃ ଆୟାରରେ କାଜିକଲେ ବାଇତାନା । ପାରମେଶ୍ୱାରଆଃ ଆୟାରରେ ଖ୍ରୀଷ୍ଟ ଆଲେକେ କାଜିକାଦ ଲେକା ଆଲେ ଆପେକେ କାଜିପେତାନାଲେ । ହେ ଦୁଲାଡ଼୍, ଗାତିକ, ସବେନ୍ ବିଷାଏ ଆପେକେ ଦେଙ୍ଗାପେ ନାଗେନ୍ଦ୍ରେଲେ କାମିତାନା । ୨୦ ଚିୟାଃଚି ଆଇୟାଃ ବର ହବାଅଃତାନା, ଆଇଙ୍କ ଆପେତାଃତେ ସେନ୍କେଦତେ ଆପେକେ ନେଲ୍ ନାଗେନ୍ତେ ସାନାଙ୍ଗତାନ୍ ଲେକା ନେଲ୍ କାଇଙ୍କ ଦାଡ଼ିୟା ଆତଃ ଆପେ ଆଇୟାଃ ଅକନ୍ ରୁପ୍ ନେଲ୍ ନାଗେନ୍ତେ କାପେ ସାନାଙ୍ଗତାନା, ହବାସାକାଅଆଃ, ଏନା ନେଲ୍ ନାଗେନ୍ତେପେ ନାମେୟା । ଏନ୍ତାଃତେ ସେନ୍କେଦତେ ଆଇଙ୍କ ଚିମିନ୍ ରାକାମରେୟାଃ ଏପେଗେର୍, ହିସଙ୍ଗା, ଖସ୍, ଆପ୍ନାଃ ନାଗେନ୍ତେ ଏସ୍କାର୍ ଉଡ଼ୁ, ହିନିସ୍ତା, ରୁପୁରାକାଜି, ଆପାନ୍କେ ମାରାଙ୍କ ମେନ୍ତେ କାଜିନ୍, ହାଲାଗୁଲା ନେ ସବେନାଃ ନେଲ୍ ନାଗେନ୍ତେଇଙ୍କ ନାମେୟା । ୨୧ ଆଇଙ୍କ ଆପେତାଃତେ ଆତଃମିସା ସେନ୍ସେଟେର୍ ଇମତା ଅକଏସାରି ପାରମେଶ୍ୱାର ଆଇଙ୍କକେ ଆପେୟାଃ ଆୟାରରେ

ହୁଡ଼ିଙ୍ଗିଲୟା, ଅକନ୍ଦ ସିଦାକରେ ପାପ୍ କାମିକାଦାକ, ଆକଆଃ ସତ୍ତରା କାଜିକାମି, ଆପାଙ୍ଗିର୍ କାମି, ଆତଃ ହଡ଼ଫରେୟାଃ ଏଡ଼କାନ୍ ସାନାଙ୍ଗ୍ ନେ ସବେନାଃ ନାଗେନ୍ତେ ଇନ୍ଦକୁ କାକ ହେୟାଡ଼ିଙ୍ଗ୍ ତାନା, ନେ ଲେକାନ୍ ହଡ଼କ ନାଗେନ୍ତେ ଆଇଙ୍ଗକେ ଏୟମ୍ ରିକା ଲାଗାଡ଼ିଙ୍ଗିୟାଃ ।

୧୩

^୧ ନେଆଁଲଃ ଆଇଙ୍ଗ୍ ଆପେତାଃତେ ଆପିସା ସେନ୍ତାନାଇଙ୍ଗ୍ । ଧାରାମ୍ପୁଥ୍ ଲେକାତେ, ବାର୍ହଡ଼୍ ଚାଏ ଆପିହଡ଼ିଆଃ ଗାଞ୍ଜାତେ ସବେନ୍ କାଜି ମାନାଡ଼ିଙ୍ଗ୍ ହବାଅଃଆ । ^୨ ସିଦାକରେ ପାପ୍କାଦ୍ ହଡ଼କକେ ଆତଃ ଏଟାଃ ସବେନ୍କକେ, ଆଇଙ୍ଗ୍ ଏନ୍ତାଃତେ ସେନ୍ୟାନ୍ଲଃ ବାର୍ସାତେ କାଜିକାଦ୍କ ତାଇକେନାଇଙ୍ଗ୍, ଆତଃ ନାହାଁଃ ସାଙ୍ଗିନ୍ରେ ତାଇକେଦ୍ତେୟ କାଜିକତାନାଇଙ୍ଗ୍, ଆଇଙ୍ଗ୍ ନେସ୍କାନ୍ ସେନ୍ରେ, ଜେତାଏ ସାଜାଇଏତେ ବାଞ୍ଚାଅ କାକ ନାମେୟା । ^୩ ଖ୍ରୀଷ୍ଟ୍ ଆଇଁୟାଃ ହରାତେ କାଜିତାନା, ଏନ୍ ବିଷାଏରେ ଆପେ ସାନାଙ୍ଗ୍ତାନ୍ ସବେନାଃରେୟାଃ ସାରୁଦ୍ପେ ନାମେୟା । ଆପେୟାଃ ନାଗେନ୍ତେ ଇନିଃ ଚିତ୍ତଲାଅ କାଏ ନାରାଦୁରାକାନା । ମେନ୍ଦ୍ ଆପେତାଃରେ ଇନିଃ ଆୟାଃ ପେଡ଼େଃରେୟାଃ ପାରିଚାଏ ଏମାକାଦାଏ । ^୪ ଇନିଃ ନାରାଦୁରାକେଦ୍ତେ କ୍ଳୁଶ୍ରେ ଗଏୟାନ୍ରେୟ ପାର୍ମେଶ୍ଵାର୍ଆଃ ପେଡ଼େଃତେ ଜୀନିଦ୍ ମେନାଇୟା । ଆୟାଃଲଃ ମେସାକେଦ୍ତେ ଆଲେ ହଗି ନାରାଦୁରାକାନାଲେ, ମେନ୍ଦ୍ ଆଲେୟାଃ ନାତା ଆପେଲଃ ପାର୍ମେଶ୍ଵାର୍ଆଃ ପେଡ଼େଃରେୟାଃ ହିସା ହବାକେଦ୍ତେ ଖ୍ରୀଷ୍ଟ୍ଲଃ ଆରୁ ଜୀନିଦ୍ ହବାଅଃଆରୁ ।

^୫ ଆପେ ବିଶ୍ଵାସ୍ରେ ମେନାପେୟା ଚି କାହା, ଏନ୍ ବିଷାଏରେ ଆପେ ଆପାନ୍କେ ବିଡ଼ାଅତାନ୍ଲଃ ବିଚାରେନ୍ପେ, ଚାଏ ଯୀଶୁ ଖ୍ରୀଷ୍ଟ୍ ଆପେରେ ତାଇନ୍ତାନାଏ, ଏନା କାପେ ଚି ଆଟ୍କାର୍ଡରୁମ୍ ତାନା ? ନେଆଁ କା ହବାଅଃତାନ୍ ରେଦ୍, ଆପେ ବିନିଡ଼ାଅରେ ପୁରାଗି ହାରାଅକାନାପେ । ^୬ ମେନ୍ଦ୍ ଆଇଁୟାଃ ଭାର୍ସା ମେନାଃ, ଆଲେ ବିନିଡ଼ାଅରେ ଜିତାଅକାନାଲେ, ଏନା ଆପେ ଆଟ୍କାର୍ ଦାଡ଼ିୟାପେ । ^୭ ମେନ୍ଦ୍ ଆପେ ଜେତାନ୍ ଏଡ଼କାନ୍ କାମିରେ ଆଲପେ ତାଇନାଃ

ମେନ୍ତେ ପାର୍ମେଶ୍ଵାର୍ତାଃରେ ଆଲେ ଆପେ ନାଗେନ୍ତେଲେ ବିକ୍ରିତାନା । ଆଲେ ବିନିତାଅରେ ଜିତାଅକାନାଲେ ଏନା ଉଦୁବେ ନାଗେନ୍ତେ ମେନ୍ତେଦ କାହା, ମେନ୍ଦ ଆଲେ ବିନିତାଅରେ ହାରାଅକାନ୍ ଲେକାଲେ ନେଲଃ ରେୟ, ଆପେ ଜେ'ଲେକା ବୁଗିନ୍ କାମିପେ କାମିୟା, ଏନାମେନ୍ତେଲେ ବିକ୍ରିତାନା । ୮ ସାନାର୍ତ୍ତିରେୟାଃ ବିରୁଧରେ କାମି ନାଗେନ୍ତେ ଆଲେୟାଃ ଆକ୍ତେୟାର୍ ବାନଃଆ, ଆଲେ ସାନାର୍ତ୍ତିରେୟାଃ ବିଷାଏରେ ଏସ୍କାର୍ କାମି ଦାଡ଼ିୟାଃଲେ । ୯ ଆଲେ ନାରାଦୁରା ତାଇକେନ୍ ଇମ୍ତା ଆପେ କେଟେୟାନ୍‌ଗିପେ ତାଇକେନା, ଏନାମେନ୍ତେ ଆଲେ ରାସ୍କାଅଃ ତାନାଲେ ଆତଃ ଆପେ ପକ୍ତାଃଅପେ ମେନ୍ତେଲେ ବିକ୍ରିତାନା । ୧୦ ଏନାମେନ୍ତେ ସାଙ୍ଗିନ୍‌ରେ ତାଇକେଦ୍‌ତେ ଆଇଙ୍ଗ୍ ଆପେତାଃତେ ଚିଟାତ ଅଲେତାନାଇଙ୍ଗ୍, ଚିୟାଃଚି ଆପେତାଃରେ ସେଟେର୍‌ୟାନ୍ ଇମ୍ତା ପ୍ରାଭୁ ଆଇଙ୍ଗ୍‌କେ ଏମାକାଦିଙ୍ଗ୍ ଆକ୍ତେୟାର୍‌କେ କେଟେଦ୍ ମନ୍‌ତେ ରିକା ଆଲକା ଲାଗାତିଙ୍ଗ୍‌କା । ଚିୟାଃଚି ଆପେକେ ହୁଡ଼ିଙ୍ଗ୍ ଜୀଉ ରିକା ନାଗେନ୍ତେଦ କାହା, ମେନ୍ଦ ବାଇ ନାଗେନ୍ତେ ପ୍ରାଭୁ ଆଇଙ୍ଗ୍‌କେ ଆକ୍ତେୟାର୍ ଏମାକାଦିୟାଏ ।

୧୧ ଚୁଣ୍ଡୁରେ ହେ ହାଗା ମିଶିକ, ରାସ୍କାଅଃପେ, ପକ୍ତାଃଅପେ, ମିହୁଡ୍ ଆତଃମିହୁଡ୍‌କେ ଜୀଉରେ ରାସ୍କା ଏପେମପେ, ମିଦ୍ ମନ୍‌ଅଃପେ, ସୁକୁରେ ତାଇନଃପେ । ଦୁଲାଡ୍ ଆତଃ ଜୀଉସୁକୁଡେ ପେରେଜାକାନ୍ ପାର୍ମେଶ୍ଵାର୍ ଆପେଲଃ ତାଇନକାଏ ।

୧୨ ଖ୍ରୀଷ୍ଟ ଦୁଲାଡ୍‌ତେ ମିହୁଡ୍ ଆତଃମିହୁଡ୍‌ଲଃ ଜହାରଃପେ । ପାର୍ମେଶ୍ଵାର୍‌ଆଃ ସବେନ୍ ହଡକ ଆପେକେ ଜହାର୍ ମେନ୍ତେକ କାଜିକୁଲତାନା ।

୧୩ ପ୍ରାଭୁ ଯୀଶୁ ଖ୍ରୀଷ୍ଟ‌ଆଃ ସାୟାଦ୍, ପାର୍ମେଶ୍ଵାର୍‌ଆଃ ଦୁଲାଡ୍, ଆତଃ ପାବିତାର୍ ଆମ୍‌ରେୟାଃ ସାଙ୍ଗାତି ଆପେ ସବେନ୍‌କଲଃ ହବାଅଃକା ।

ପାରମେଶ୍ଵରୀୟାଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵରୀୟାଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵରୀୟାଃ ଜୀନିଦ୍ ବାଚାନ୍
ନାଞ୍ଜା ନିୟମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6